

四庫全書

集部

欽定四庫全書

集部

施註蘇詩卷三十五至  
七

詳校官庶吉士<sub>臣</sub>李傳熊

檢討<sub>臣</sub>何思鈞覆勘

覆校官中書<sub>臣</sub>宋 鎔

校對官中書<sub>臣</sub>王鍾泰

謄錄監生<sub>臣</sub>張士琛

謄錄貢生<sub>臣</sub>周世燦

欽定四庫全書

施註蘇詩卷三十五

宋蘇軾撰

施元之原註

武進邵長蘅刪補

詩四十五首

起南遷盡在惠州  
施註缺今補

壺中九華詩

一統志九華山在青陽縣舊名九  
子山李白謂九峰似蓮花乃更今

名

湖口人李正臣蓄異石九峰玲瓏宛轉若牕櫺然  
予欲以百金買之與仇池石為偶方南遷未暇也  
名之曰壺中九華且以詩記之

清溪電轉失雲峰夢裏猶驚翠掃空五嶺莫愁千嶂外  
九華今在一壺中天池水落層層見玉女牕明處處通  
念我仇池太孤絕百金歸買碧玲瓏

裴氏廣州記大庾始安臨賀桂陽揭陽是謂五嶺壺  
中用費長房事詳第八卷刁景純席上詩注莊子逍

遙遊南溟者天池也又按青城廬山峽山所在皆有  
天池詩特借言耳王文考魯靈光殿賦玉女闥牕而  
視下

### 江西一首

江西山水真吾邦白沙翠竹石底江舟行十里磨九瀧  
篙聲曄曄相舂撞醉卧欲醒聞淙淙真欲一口吸老龐  
何人得儁窺魚矸舉又絕叫尺鯉雙

杜子美詩白沙翠竹江村暮柳宗元小石潭記下見小  
潭水尤清冽泉石以為底地志韶州昌樂縣有瀧水說  
文瀧奔水也韓退之詩山石曄曄行逕微又詩船石相  
舂撞傳燈錄龐居士蘊參馬祖云不與萬法為侶者是

什麼人祖云侍汝一口吸盡西江水即向汝道左傳莊  
十一年得僞曰克韓退之又魚詩得僞語時置爾雅石  
砭謂之砭古樂府客從  
遠方來贈我雙鯉魚

秧馬歌

并引

過廬陵見宣德郎致仕曾君安止出所作禾譜文  
既溫雅事亦詳實惜其有所缺不譜農器也予昔  
遊武昌見農夫皆騎秧馬以榆棗為腹欲其滑以  
楸桐為背欲其輕腹如小舟昂其首尾背如覆瓦  
以便兩髀崔躍於泥中繫束藁其首以縛秧日行

千畦較之偃僂而作者勞佚相絕矣史記禹乘四  
載泥行乘橈解者曰橈形如箕適行泥上豈秧馬  
之類乎作秧馬歌一首附於禾譜之末云

春雲濛濛雨淒淒春秋秧欲老翠剗齊嗟我婦子行水泥  
朝分一壠暮千畦腰如筲篲首啄雞筋煩骨殆聲酸嘶  
我有桐馬手自提頭尻軒昂腹脇低背如覆瓦去角圭  
以我兩足為四蹠聳踊滑汰入聲如鳬驚纖纖束縶亦可

齋何用繁纓與月題卻從畦東走畦西山城欲閉聞鼓

輦忽作的盧躍檀溪歸來挂壁從高栖了無芻秣飢不

啼少壯騎汝逮老鰲何曾蹶軼防顛隤一作擠錦韉公子

朝金閨笑我一生蹋牛犁不知自有木馱馱

杜子美稻畦詩芊芊炯翠羽刺刺向銀漢篋篋見首卷  
壬寅寄子由詩注按篋篋似箏而腰曲故以為比韓退  
之詩磨淬出角圭古樂府解題有兩頭織織詩晉載記  
童謡曰一束藁兩頭燃周禮王之五路一曰玉路錫繁  
纓註疏繫馬大帶纓馬鞍也月題字出莊子馬頤上當  
顧如月形者的盧劉備事詳見十二卷和子由同遊百  
步洪詩注又水經注檀溪今有的盧溪尚書微子今爾  
無指告子顛隤江文通別賦金閨之諸彥注金馬門也  
杜子美詩李侯金閨彥馱馱字見漢書  
匈奴傳注俊馬也生七日而起其母



八月七月初入贛過惶恐灘

七千里外二毛人十八灘頭一葉身山憶喜懼勞遠夢

公自注蜀道有錯喜歡舖在大散關上

地名惶恐泣孤臣長風送客添帆

腹積雨浮

一作扶

舟減石鱗便合與官克水手此生何止

略知津

一統志贛州府城北章貢二水所合抵萬安縣界有十八灘惶恐其一也中多怪石最險

鬱孤臺

公自注以下四首皆虔州

八境見圖畫鬱孤如舊游山為翠浪湧水作玉虹流日

麗崆峒曉風酣章貢秋丹青未變葉鱗甲欲生洲嵐氣  
昏城樹灘聲入市樓煙雲侵巖路草木半炎州故國千  
峰外高臺十日留他年三宿處準擬繫歸舟

八景圖詩見十三卷一統志崆峒山在贛州郡城南後  
凡言崆峒者指此非隴州之崆峒也水經注劉登之曰  
贛縣東南有章水西有貢水縣治二水之間因以名焉  
楚辭遠遊嘉南州之炎德韓退之詩南逾橫嶺入炎州  
或作洲三宿用內典語又浮屠不三宿桑下  
出後漢襄楷傳詳見二十卷別黃州詩注

廉泉

水性故自清不清或撓之君看此廉泉五色爛摩尼廉

者謂我廉我以此名為有廉則有貪有慧則有癡誰為  
柳宗元孰是吳隱之漁父足豈潔許由耳何溜紛然立  
名字此水了不知毀譽有時盡不知無盡時竭來廉泉  
上捋鬢看鬢眉好在水中人到處相娛嬉

圓覺經譬如清淨摩尼寶珠映於五色隨方各現杜詩  
惟有摩尼珠可照濁水源再見愚溪貪泉洗耳並已見  
先生汎穎詩云豈此  
水薄相與我相娛嬉

### 塵外亭

楚山澹無塵潁水清可厲散策塵外遊麾手謝此世山

高惜人力十步輒一憩卻立浮雲端俯視萬井麗幽人  
宴坐處龍虎為斬雜馬駒獨何疑豈墮山鬼計夜垣非  
助我謬敬欲其逝戲留一轉語千載起攘袂

幽人以下八句皆指馬祖事傳燈錄六祖謂南嶽曰向  
去佛法從汝邊去西天般若多羅識汝足下出一馬駒  
踏殺天下人厥後江西傳法遂廣布於天下時號馬祖  
又馬祖始居此山山鬼為築垣自謂修行不至為鬼所  
識乃捨去又洞山直道本來  
無一物這裏合下得一轉語

天竺寺

井引

予年十二先君自虔州歸謂予言近城山中天竺

寺有樂天親書詩云一山門作兩山門兩寺元從  
一寺分東澗水流西澗水南山雲起北山雲前臺  
花發後臺見上界鐘清下界聞遙想吾師行道處  
天香桂子落紛紛筆勢奇逸墨跡如新今四十七  
年予來訪之則詩已亡有刻石存耳感涕不已而  
作是詩

香山居士留遺跡天竺禪師有故家空詠連珠吟疊壁  
已亡飛鳥失驚蛇林深野桂寒無子雨浥山薑病有花

四十七年真一夢天涯流落淚橫斜

唐宣宗弔樂天詩綴玉連珠三十年誰教冥路作詩仙  
按樂天此詩乃連珠體也書評懷素草書如飛鳥出林  
驚蛇入草嶺表異錄山薑花莖葉即薑也根不堪  
食而葉間吐花細如麥粒按本草木一名山薑

過大庾嶺

一念失垢汙身心洞清淨浩然天地間惟我獨也正今  
日嶺上行身世永相忘仙人拊我頂結髮受長生

莊子德充符受命於地惟松柏獨也正正在冬夏青青受  
命於天惟堯舜獨也正正在萬物之首白樂天詩可憐身  
與世從此兩相忘仙人二句乃李白沅夜  
郎贈韋太守詩先生用其語蓋有所感也

宿建封寺曉登盡善亭望韶石三首

圖經傳聞有二仙人

衣冠相對踞坐二石上云昔帝舜嘗奏樂於此言訖不見郡國志韶州有韶石山舜登此奏韶樂焉一統志在府城東北山多怪石

雙闕浮光照短亭至今猿鳥獻青瑩君王自此西巡狩  
再使魚龍舞洞庭

水經韶石對峙似闕又有鳳閣毬門之名劉夢得詩乘  
標不來廣樂絕獨與猿鳥愁青瑩西巡狩詩意以岳州  
洞庭在韶州西故云自此而西特借用舜典字耳莊子  
天運篇黃帝張咸池之樂於洞庭之野列子瓠巴鼓琴  
而鳥舞  
魚躍

蜀人文賦楚人辭堯在崇山舜九疑聖主若非真得道  
南來萬里亦何為

司馬相如大人賦歷唐堯於崇山兮過虞舜於九疑漢  
書注崇山狄山也海外經曰狄山帝堯葬於其陽九疑  
山在零陵營道縣舜所葬也山海經南方蒼梧之丘其  
中有九疑山舜所葬處

嶺海東南月窟西功成天已錫玄圭此方定是神仙宅  
禹亦東來隱會稽

揚雄長楊賦西厭月窟東震日域尚書禹貢禹錫元圭  
告厥成功孫綽天台山賦元聖之所降遊靈仙之所窟  
宅史記夏本紀禹東巡狩至於會稽而崩帝王世紀  
禹崩於會稽葬會稽山陰縣之南今山上有禹塚



月華寺

公自注寺鄰岑水場施者皆坑戶也百年間蓋三焚矣

天公胡為不自憐結土融石為銅山萬人探斲富媪泣  
祇有金帛資豪姦脫身獻佛意可料一瓦坐待千金還  
月華三火豈天意至今爰舍依榛菅僧言此地本龍象  
興廢反掌曾何艱高巖夜吐金碧氣曉得異石青爛斑  
坑流窟發錢湧地莫施百鎰朝千鍰此山出寶以自賤  
地脈已斷天應慳我願銅山化南畝爛熳黍麥蘇惇鰥  
道人修道要底物破鐺煮飯茹三間

漢書吳有章郡銅山又賜通蜀東道銅山鑄錢又禮樂志郊社歌后土富媪昭明三光張晏注曰媪老母稱也坤為母故稱媪周禮大司馬仲夏教菱舍註草舍也智度論水行中龍陸行中象故荷大法力比之龍象按月華寺智樂三藏真身在焉故有龍象之語史記天官書金寶之上皆有氣杜子美詩潤聚金碧氣清無砂土痕漢書秦幣黃金方寸而重一斤以鎰為名尚書呂刑其罰千鍰史記蒙恬列傳蒙恬喟然太息曰起臨洮屬之遼東城塹萬餘里此其中不能無絕地脈哉

南華寺

曹溪通志南華山南華寺為六祖慧能道場按通首皆六祖事

云何見祖師要識本來面亭亭塔中人問我何所見可憐明上座萬法了一電飲水既自知指月無復眩我本

修行人三世積精鍊中間一念失受此百年譴摠衣禮  
真相感動淚雨霰借師錫端泉洗我綺語硯

傳燈錄道明禪師問五祖密付衣鉢與盧行者即躡跡  
追逐至庾嶺曰我來求法願行者開示祖曰不思善不  
思惡正恁麼時那個是明上座本來面目師當下大悟  
楞嚴經如人以手指月示人彼人因指當應看月若復  
觀指以月為體此人豈惟亡失月輪亦亡其指禮記樞  
衣趨隅必慎唯諾鮑昭詩月下如流霰傳燈錄六祖初  
住曹溪卓錫泉湧清涼甘滑膳足大衆曹溪志卓錫  
泉一名明通泉凡泉脉枯僧持祖衣往叩即通流

碧落洞

公自注在英  
州下十五里

槎牙亂峰合晃蕩絕壁橫遙知紫翠間古來仙釋并陽

崖射朝日高處連玉京陰谷叩白月夢中遊化城果然  
石門開中有銀河傾幽龕入窈窕別戶穿虛明泉流下  
珠琲乳湍交縵纓我行畏人知恐為仙者迎小語輒響  
答空山自雷驚策杖歸去來治具煩方平

靈樞金景內經下離塵境上界玉京注云玉京無為之  
天也蓋三十二帝之都法華經有一真師以方便力化  
作一城於是衆人前入化城生已度想生安穩想一統  
志洞多懸石如霓旌羽蓋旁有小洞號雲華深不可測  
按詩所云幽龕別戶即指其處也史記魏其武安侯傳  
魏其夫妻治具自旦至今未敢嘗食神仙傳王方平降  
蔡經家須臾麻姑繼至再拜方平行廚具食皆金  
盤玉杯多諸花果芬香異常擘脯食之云是麟脯

# 峽山寺

公自注傳奇所記孫恪袁氏事  
即此寺至今有人見白猿者

天開清遠峽地轉凝碧灣我行無遲速攝衣步屨顏山  
僧本幽獨乞食况未還雲碓水自春松門風為闕石泉  
鮮娛客琴筑鳴空山佳人劍翁孫遊戲暫人間忽憶嘯  
雲侶賦詩留玉環林深不可見霧雨霾一作埋髻鬟

郭璞江賦豁若天開地志清遠峽一名中宿峽崇山峻  
立中貫江流寺一名飛來寺白樂天詩藥爐有火丹應  
伏雲碓無人水自春釋惠標詩松門夾細草又杜子美  
詩松門似畫圖吳越春秋越王問劍於處女處女將見  
王道逢袁公公曰聞子善劍術女子曰願試也公即挽  
以刺女女舉杖擊之公即上樹化而為白猿傳奇廣德

中有孫恪者遊洛中遇袁氏女遂納為室後十餘年同至峽山寺袁氏欣然改服理鬢詣老僧乃持一碧玉環獻僧曰此是院舊物僧初不曉及齋罷有野猿數十悲嘯捫蘿而躍袁氏惻然俄命筆題詩云無端變化幾湮沈剛被恩情役此心不如逐伴歸山去長嘯一聲煙霧深詩畢遂裂衣化為老猿追嘯者躍樹而去老僧方悟曰乃貧道為沙門時所養者碧玉環則胡人所施繫於其頸者

舟行至清遠縣見顧秀才極談惠州風物之美到處聚觀香案吏此邦宜著玉堂仙江雲漠漠桂花溼梅雨脩脩荔子然聞道黃柑常抵鵲不容朱橘更論錢恰從神武來宏景便向羅浮覓稚川

唐史若仗在紫宸內閣則起居舍人夾香案分立殿下  
杜子美詩朱橘不論錢晉書葛洪字稚川聞交趾出丹  
砂求為勾漏令刺史鄧嶽留  
不聽去洪乃止羅浮山屢見

### 廣州蒲澗寺

公自注地產菖蒲十二節相傳安  
期生之故居始皇訪之於此太平

寰宇志菖蒲澗一名甘溪南  
越志云交州刺史陸允所開

不用山僧導我前自尋雲外出山泉千章古木臨無地  
百尺飛濤瀉漏天昔日菖蒲方士宅後來薝蔔祖師禪

而今只有花含笑笑道秦皇欲學仙

公自注山中  
多含笑花

史記貨殖傳山居千章之椒注大材曰章又杜子美詩  
千章夏木清寰宇記戎州宜賓縣有大黎小黎二山四

時霑霖俗謂之大漏天小漏天唐詩地道漏天終歲雨  
杜子美詩鼓角漏天東香譜旆子香出大食國即佛書  
所謂舊蜀也傳燈錄仰山謂香嵒禪師曰汝只得如來  
禪未得祖師禪遜齋聞覽南方花木北地所無者大舍  
笑小舍笑其花常若菡萏  
之未敷者故有含笑之名

贈蒲澗長老

優鉢曇花豈有花問師此曲唱誰家已從子美得桃竹  
公自注此山有桃竹可作杖而  
上人不識予始錄子美詩遺之不向安期覓棗瓜燕坐  
林間時有虎高眠粥後不聞鴉勝遊自古無支許為採  
松肪寄一車



法華經佛告舍利佛如是妙法如優曇鉢花時一現耳  
王注佛言優曇鉢五百年而開花其花極香且有花而  
無實傳燈錄風穴延沼禪師有盧陂長老問曰師唱誰  
家曲宗風嗣阿誰延沼禪師曰超然迥出威音外翹足  
徒勞讚底沙志林桃李葉如棕身如竹密節而實中蓋  
天成拄杖也杜子美桃李枝引江心蟠石生桃李蒼波  
噴浸尺度足斬根削皮如紫玉江妃水仙惜不得云云  
晉書王羲之傳會稽有佳山水名士多居之孫綽李充  
許詢支遁等皆以文義冠世並築室東土與羲之同  
好本草松脂久服輕身不老一名松脂一名松肪

### 發廣州

朝市日已遠此身良自如三杯軟飽後

公自注浙人謂飲酒為軟飽

一枕黑甜餘

公自注俗謂睡為黑甜

蒲澗疎鐘外黃灣落木初天

涯未覺遠處處各樵漁

韓退之南海神廟碑扶胥之口  
黃木之灣按灣在府城東南

浴日亭

公自注在  
南海廟前

劍氣崢嶸夜插天  
瑞光明滅到黃灣  
坐看暘谷浮金暈  
遙想錢塘涌雪山  
已覺滄涼蘇病骨  
更煩沆瀣洗衰顏  
忽驚鳥動行人起  
飛上千峰紫翠間

列子孔子東遊見兩小兒辯鬪其一曰日出之初滄滄  
涼涼及其日中熱如探湯司馬相如大人賦呼吸沆瀣  
兮餐朝霞

游羅浮山一首示兒子過

人間有此白玉京羅浮見日雞一鳴

公自注劉夢得有詩記羅浮夜半見

日事山不甚高而夜見日此可異也

南樓未必齊日觀鬱儀自欲朝朱明

公自注山有二石樓今延祥寺在南樓下朱明洞在冲虛觀後云是蓬萊第七洞天

東坡之師抱

朴老真契久已交前生玉堂金馬久流落寸田尺宅今

誰耕道華亦嘗啖一棗

公自注唐永樂道士侯道華竊食鄧天師藥仙去永樂有無核

棗人不可得道華獨得之予在岐下亦嘗得食一枚

契虛正欲仇三彭

公自注唐僧契虛遇

人導游稚川仙府真人問曰汝絕三彭之仇乎契虛不能答

鐵橋石柱連空橫

公自注山

有鐵橋石柱人罕至者

杖藜欲趁飛猱輕雲谿夜逢瘖虎伏

公自注山

有啞虎巡山

斗壇畫出銅龍吟

公自注冲虛觀後有朱真人朝斗壇近於壇上獲銅龍六

銅魚

小兒少年有奇志中宵起坐存黃庭近者戲作凌

雲賦筆勢彷彿離騷經負書從我盍歸去羣仙正草新

宮銘汝應奴隸蔡少霞我亦季孟山元卿

公自注唐有夢書新宮銘

者云紫陽真人山元卿撰其略曰良常西麓原澤東泄新宮宏宏崇軒轅轅又有蔡少霞者夢人遺書碑略曰昔乘魚車今履瑞雲躅空仰塗綺輅輪囷其末題云五雲書閣吏蔡少霞書

還須略報老同

叔羸糧萬里尋初平

公自注子由一字同叔

李太白詩天上白玉京十二樓五城劉禹錫羅浮山詩  
陰陽迭用事乃俾夜作晨呶呶天雞鳴扶桑色昕昕赤  
波千萬里湧出黃金輪鄒師正羅浮指掌圖山高三十六  
大表直五百里周三百里上有大小石樓相去五里皆高出  
雲表登之可望滄海夜半見日初出泰山日觀注屢見  
黃庭內景經高奔日月吾上道鬱儀結鄰善相保注鬱  
儀奔日之仙也茅君內傳太天之內有地中之洞天三  
十六所羅浮山之洞周迴五百里名曰朱明耀真之天  
謝靈運羅浮山賦朱明之陽宮耀真之陰室又山志云  
朱明洞即葛洪修煉之地黃庭內景經脾神常在字魂  
庭晝夜存之可長生注云覓黃庭也初平  
事見十四卷和子由送將官梁左藏詩註

十月二日初到惠州

按年譜為紹聖元年十月

彷彿曾遊豈夢中欣然雞犬識新豐吏民驚怪坐何事

父老相携迎此翁蘇武豈知還漠北管寧自欲老遼東

嶺南萬戶皆春色

公自注嶺南萬戶

酒會有幽人客寓公

西京雜記高祖既作新豐并移舊杜衡巷棟宇物色惟舊男女老幼相携路首各知其室放犬羊雞鴨於通衢亦競識其家三國志管寧北海朱虛人方天下大亂寧聞公孫度令行於海外遂與邴原王烈等至遼東即往見度遂廬於山谷示無遷志禮記諸侯不臣寓公

### 寓居合江樓

海上葱曠氣佳哉二江合處朱樓開蓬萊方丈應不遠  
甯為蘇子浮江來江風初涼睡正美樓上啼鴉呼我起

我今身世兩相違  
西流白日東流水  
樓中老人日清新  
天上豈有癡仙人  
三山咫尺不歸去  
一杯付與羅浮春

公自注予家釀酒名羅浮春

二江東江西江也按府志東江自贛州南流過龍川河源至府城東西江在府城西南蓬萊方丈注屢見按廣州香山縣有三洲山三山並立海中詩意似指此續仙傳侯道華好子史手不釋卷衆或問之要此何為荅曰天上無愚瞽仙人

白水山佛跡巖

公自注羅浮之東麓也在惠州東北二十里顧微廣州記南海

增城縣白水山有瀑布懸注百許丈西有佛跡巖其東湯泉出焉志林紹聖元年十月十

二日過遊白水佛跡院浴于湯池熱甚其源殆可熟物循山而東有懸水百仞八九折折處輒為潭水涯有巨人跡數十所謂佛跡也

何人守蓬萊夜半失左股浮山若鵬蹲忽展垂天羽根株互連絡崖嶠爭吞吐神工自爐鞴融液相綴補至今餘隙罅流出千斛乳方其欲合時天匠麾月斧帝觴分餘瀝山骨醉后土峰巒尚開闔澗谷猶呼舞海風吹未凝古佛來布武當時汪罔氏投足不蓋拇青蓮雖不見千古落花雨雙溪匯九折萬馬騰一鼓奔雷濺玉雪潭



洞開水府潛鱗有饑蛟掉尾取渴虎我來方醉後濯足  
聊戲侮回風卷飛電掠面過彊弩山靈莫惡劇微命安  
足賭此山吾欲老慎勿厭求取谿流變春酒與我相賓  
主當連青竹竿下灌黃精圃

地理志惠州浮山自會稽來今浮山上猶有東方草木  
又羅浮山記羅山自為一山浮山即蓬萊別島堯時洪  
水浮至依羅而止二山合體謂之羅浮按詩中蓬萊失  
守及根株連絡神工綴補語即指此易明夷夷于左股  
莊子逍遙遊鵬之背若太山其翼若垂天之雲禮記堂  
下布武家語孔子曰汪罔氏之君守封嵎之山者為漆  
姓在虞夏商為汪罔氏於周為長翟氏按古佛三句指  
巨人跡也楞嚴經即時天雨百寶蓮花青黃赤白間錯

紛糴柳子厚山水記泉大類穀雷鳴西奔李白襄陽歌  
此江若變作春酒壘麴便築糟丘臺杜子美泉眼詩何  
當宅下流餘潤通藥圃三  
春溼黃精一食生毛羽

詠湯泉

公自注在  
白水山

積水焚大槐蓄油災武庫驚然丞相井疑浣將軍布自  
憐耳目隘未測陰陽故鬱攸火山烈威沸湯泉注豈惟  
渴獸駭坐使癡兒怖安能長魚鼈僅可燖狐兔山中惟  
木客戶外時芒屨雖無傾城浴幸免亡國污

莊子雜篇水中有火乃焚大槐博物志積油萬石則自  
然生火昔晉泰武中武庫火積油所致又臨邛火井諸

葛丞相往視之後火轉盛異苑亦云聖證論梁冀衣布有垢則洗之於火後漢梁冀傳帝曰此跋扈將軍也列子周穆王大征西戎西戎獻火浣之布浣之必投于火布則火色垢則布色出火而振之皓然疑乎雪十洲記炎洲在南海中有火林山山中有獸大如鼠毛長三四寸取其毛績以為布名曰火浣布左傳哀三年司鐸火子服景伯命濟濡帷幕鬱攸從之注鬱攸火氣也山海經注火山國雖經霖雨火常烈魏書崑崙之墟有炎火之山詩小雅威洊泉吳越春秋越有木客村勾踐使工人伐木欲以獻吳久不得歸工人憂思作木客吟後人因以名其地互見十三卷八境圖詩

注驪山華清宮有溫泉即貴妃浴處

### 自笑一首

子石如琢玉遠煙真削鰲入我病風手

公自注古語云磨墨如病風手

玄雲滄淒淒是中有何好而我喜欲迷既似蠟屐阮又

如鍛柳嵇醉筆得天公宛宛天投蜺

一作寬

多謝中書君

伴我此幽栖

歐陽永叔硯譜端石以子石為上本草松栢千年為茯  
苓又千年為琥珀又千年為鸞燒之作松氣為用與琥  
珀同狀似玄玉而甚輕出西戎釋名璽是衆珀之長亦  
曰璽其色鸞黑故名阮履嵇鍛並已見詩小雅有滄淒  
淒後漢五行志靈帝光和元年有黑氣墮北宮溫明殿  
東庭中黑如車蓋起奮迅身五色有頭體長十餘丈形  
貌似龍上問蔡邕對  
曰所謂天投蜺者也

朝雲詩

并引

世謂樂天有粥駱馬放楊柳枝詞嘉其主老病不忍去也然夢得有詩云春盡絮飛留不得隨風好去落誰家樂天亦云病與樂天相伴住春隨樊子一時歸則是樊素竟去也予家有數妾四五年相繼辭去獨朝雲者隨予南遷因讀樂天集戲作此詩朝雲姓王氏錢塘人嘗有子曰幹兒未暮而夭云

不似楊枝別樂天恰如通德伴伶玄阿奴絡秀不同老

天女維摩總解禪經卷藥鑪新活計舞衫歌扇舊因緣  
丹成逐我三山去不作巫陽雲雨仙

前三句故實屢見按阿奴句似指幹兒之天也維摩經天女居維摩室與舍利佛發明禪理維摩曰此天女已能遊戲菩薩之神通也白樂天集有閒居貧活計詩宋玉高唐賦昔者先王嘗遊高唐怠而晝寢夢一婦曰妾巫山之神女也旦為朝雲暮為行雨朝朝暮暮陽臺之下

寄虎兒

按虎兒猶子遠也

獨倚桄榔樹間挑草撥根謀生看拙否送老此蠻村

廣志桄榔樹大四五圍長五六丈直上無條枝可作杖其顛生葉不過數十似拼欄本草闡經草撥生波斯國

今嶺南有之多生竹林內  
正月發苗作叢高三四尺

十一月二十六日松風亭下梅花盛開

按年譜先生以

紹聖元年十月三日至惠州寓居嘉祐寺松風亭

春風嶺上淮南村昔年梅花曾斷魂

公自注予昔赴黃州春風嶺上見梅

花有兩絕句明年正月往岐亭道上賦詩云去年今日關山路細雨梅花正斷魂

豈知流落復

相見蠻風蜚雨愁黃昏長條半落荔枝浦卧樹獨秀枕

柳園豈惟幽光留夜色直恐冷艷排冬溫松風亭下荆

棘裏兩株玉藥明朝暎海南仙雲嬌墮砌月下縞衣來

扣門酒醒夢覺起繞樹抄意有在終無言先生獨飲勿  
歎息幸有落月窺清尊

一統志廣州府城東有荔枝洲周五十里南漢  
嘗建昌華苑其上按鵞衣以下即咏趙師雄事

再用前韻

羅浮山下梅花村玉雪為骨冰為魂紛紛初疑月挂樹  
耿耿獨與參橫昏先生索居江海上悄如病鶴栖荒園  
天香國艷宵相顧知我酒熟詩清溫蓬萊宮中花鳥使  
綠衣倒挂扶桑暎

公自注嶺南珍禽有倒挂子綠衣紅  
喙如鸚鵡而小自海東來非塵埃中



也抱叢窺我方醉卧故遣啄木先敲門麻姑過君急掃  
灑鳥能歌舞花能言酒醒人散山寂寂惟有落藥粘空

# 樽

唐撫言僧栖白詩忍苦為詩身到此冰魂雪魄已難招  
杜子美徐卿二子歌秋水為神玉為骨又詩天橫醉後  
參禮記子夏曰吾離羣而索居亦已久矣唐明皇天寶  
末遣使採民間美女納之宮中號花鳥使劉續霏雪錄  
桐花鳳即東坡詞所謂倒挂綠毛么鳳是也李之儀詠  
倒挂詞自注云此鳥以十二月來好集美人釵上謂之  
收香倒挂又名探花使按此則花鳥使正指倒挂也異  
物志啄木大如鵲青黑色人呼為山啄木穿木食蠹左  
思詩南山有鳥自名啄木韓退之詩洛陽窮秋厭窮獨  
丁丁啄門疑啄木李肇國史補李泌以虛誕自任嘗對

客曰令家人速掃灑今夜洪崖先生來有人遺美酒會  
有客至乃曰麻姑送酒來與君同傾言未畢門者曰某  
侍郎取榼子必命  
削還略無忤色

新釀桂酒

先生桂酒頌序楚辭曰奠桂酒兮椒  
漿是桂可以為酒也有隱居者以桂

酒方穀吾釀成而玉色  
香味超然非世間物也

搥香篩辣入瓶盆盎盎春溪帶雨渾收拾小山藏社蠶  
招呼明月到芳樽酒材已遣門生致菜把仍叨地主恩  
爛煮葵羹斟桂醕風流可惜在蠻村

小山淮南小山作招隱士篇其詞曰桂樹叢生兮山之  
幽三見周禮酒正以式法授酒材杜子美詩清晨蒙菜

把常荷  
地主恩

惠守詹君見和復次韻

已破誰能惜甑盆  
頽然醉裏得全渾  
欲求公瑾一倉米  
試滿莊生五石樽  
三杯卯困忘家事  
萬戶春濃感國恩  
刺史不須要半道  
籃輿未暇走山村

破甑孟敏事見第七卷與周長官游徑山詩注三國吳  
魯肅傳周瑜故過候肅并求資糧肅家有兩囤米各三  
千斛肅乃指一倉與周瑜公瑾瑜字白樂  
天有卯飲詩藍輿半道用陶淵明事屢見

花落復次前韻

玉妃謫墮煙雨村先生作詩與招魂人間草木非我對

奔月偶挂成幽昏暗

一作閨

香入戶尋短夢青子綴枝留

小園披衣連夜喚客飲雪膚滿地聊相溫松明照坐愁  
不睡井花入腹清而嗽先生來年六十化道眼已入不  
二門多情好事餘習氣惜花未忍都無言留連一物吾  
過矣笑領百罰空壘樽

玉妃借用太真事招魂楚辭篇名宋玉哀閨屈原無罪  
放逐恐其魂魄離散遂託帝命假巫語以招之杜子美  
詩兒童汲井花慣提瓶在手本草井花水平旦第一汲  
者令人好顏色莊子蘧伯玉行年六十而六十化再見

北史王晞傳謂盧思道曰卿輩亦是留連之一物豈直魚鳥而已杜子美詩數莖白髮那拋得百罰深杯亦不辭

江郊

并序

惠州歸善縣治之北數步抵江少西有盤石小潭可以垂釣作江郊詩云

江郊蔥朧雲水蒨絢碕岸斗入洄潭輪轉先生悅之布席閒燕初日下照潛鱗俯見意釣忘魚樂此竿綫優哉悠哉玩物之變

柳子厚記流沫成輪唐張志和傳自稱煙波釣徒志不在魚每垂釣不設餌韓退之詩舉竿引線忽有得詩小雅優哉悠哉

詹守携酒見過用前韻作詩聊復和之

箕踞狂歌老瓦盆  
燎毛燔肉似羌渾  
傳呼草市來携客  
灑掃漁磯共置尊  
山下黃童爭看舞  
江干白骨已銜恩  
公自注時詹方議葬暴骨孤雲落日西南望長羨歸鴉自識村

杜子美少年行莫笑田家老瓦盆又三絕句  
縱暴略與羌渾同注謂吐谷渾西羌種也

寄鄧道士并序

羅浮山有野人相傳葛稚川之隸也鄧道士守安

山中有道者也嘗於菴前見其足跡長二尺許紹

聖二年正月二日予偶讀韋蘇州寄金椒山中道

士詩云今朝郡齋冷忽念山中客澗底束荆薪歸

來煮白石

抱朴子內篇云引石散以方寸匕投一斗白石子中以水合煮之立熟如芋子

可食以當穀

遙持一樽酒遠慰風雨夕落葉滿空山何

處尋行迹乃以酒一壺依蘇州韻作詩寄之

一杯羅浮春遠餉採薇客遙知獨酌罷醉卧松下石幽

人不可見清嘯聞月夕聊戲菴中人空飛本無迹

嵇叔夜養生論採薇山阿散髮  
岩岫椰子厚詩飛鳥無遺跡

上元夜

公自注  
惠州作

前年侍玉輦端門萬枝燈壁月挂果懸珠星綴觚稜去  
年中山府老病亦宵興牙旗穿夜市鐵馬響春冰今年  
江海上雲房寄山僧亦復舉膏火松閒見層層散策枕  
柳林林疎月翳髻使君置酒罷簫鼓轉松陵狂生來索  
酒

公自注賈  
道人也

一舉輒數升浩歌出門去我亦歸曹騰



端門宣德門也宋故事元夕皇帝登端門以宴羣臣果  
愚觚稜並已見中山府定州也南部新書云軍前大旗  
謂之牙旗又先生定州詩云鐵騎曉  
出冰河裂二句正指帥定武軍時事

正月二十四日與兒子過賴仙芝王原秀才僧

曇穎行全道士何宗一同游羅浮道院及栖禪

精舍過作詩和其韻寄邁迨一首

栖禪寺在惠州豐湖上

斷橋隔勝踐脫屣欣小揭瘴花已繁紅官柳猶疎細斜  
川二三子悼歎吾年逝淒涼羅浮館風壁頽雨砌黃冠  
常苦饑迎客羞破袂仙山在何許歸鶴時墮毳崎嶇食

松黃欲救齒髮弊坐令禪客笑一夢等千歲栖禪晚置  
酒蠻果粢蕉荔齋厨釜無羹野餉籃有蕙嬉游趁時節  
俯仰了此世猶當洗業障更作臨水袂寄書陽羨兒并  
語長頭弟門戶各努力先期畢租稅

詩國風淺則揭注攝衣涉水曰揭陶淵明游斜川詩序  
天氣澄和風物開美與二三鄰曲同游斜川又云悲日  
月之遂往悼吾年之不留本草圖經松枝上黃粉名松  
黃應劭風俗通襪者潔也於水上盥潔之也王注陽羨  
兒邁也長頭弟迨也二子  
在常州迨長頭見先生詩

正月二十六日偶與數客野步嘉祐僧舍東南

野人家雜花盛開扣門求觀主人林氏媼出應  
白髮青裙少寡獨居三十年矣感歎之餘作詩

記之一首

白鶴故居圖嘉祐寺在歸善縣西

縹蒂細枝出絳房綠陰青子送春忙涓涓泣露紫含笑  
焰焰燒空紅佛桑落日孤煙知客恨短籬破屋為誰香  
主人白髮青裙袂子美詩中黃四娘

杜牧之詩醉折梨園縹蒂花李商隱詩紅苞雜絳房釋名錄白色曰縹淺黃色曰細大赤色曰絳余皇日疏佛桑出嶺南枝葉類江南檉樹花類中州芍藥而輕柔過之有深紅深紫淺紅數種剪插於土即活杜子美詩黃

四娘家花  
滿蹊再見

龍虎石研寄猶子遠

皎皎穿雲月青青出水荷文章工點黠忠義老研磨偉  
節何須怒寬饒要少和吾衰此無用寄與小東坡

公自注遠

為人  
類予

晉書衛恒傳草書勢云或點點狀似連珠絕而不  
離後漢書賈彪字偉節兄弟三人並有高名而彪最優  
故天下稱曰賈氏三虎偉節最怒漢書蓋寬饒傳自以  
行清能高而為凡庸所越愈失意不快數上書諫諍太  
子庶子王生高寬饒節而非其如此子書云云寬饒不納竟被害

贈王子直秀才

萬里雲山一破裘杖端閑挂百錢游  
五車書已留兒讀  
二頃田應為鶴謀水底笙歌蛙兩部  
山中奴婢橘千頭  
幅巾我欲相隨去海上何人識故侯

次韻表兄程正輔江行見桃花

曲士賦懷沙草木傷莽莽德人無荆棘  
坐失嶺嶠阻我  
兄瑚璉姿流落瘴江浦淨眼見桃花  
紛紛墮紅雨蕭然  
振衣裊笑問散花女我觀解語花  
粉色如黃土一言破

千倡况爾初不語可憐一轉話他日如何舉故復此微  
吟聊和鷗鴉擗江邊閒草木閑客當為主爾來子美瘦  
正坐作詩苦袖手焚筆研清篇真漫與願君一作理北  
轅六轡去如組上林桃花開水煖鴻北翥

史記屈平既紉乃作懷沙之賦其辭云滔滔孟夏兮草  
木莽莽傷懷永哀兮汨徂南土維摩詰經速塵離垢得  
法眼淨李賀將進酒歌况是青春日將暮桃花亂落如  
紅雨振衣散花見十七卷李公擇過高郵詩注天寶遺  
事太液池千葉白蓮開帝與貴妃宴賞指妃謂左右曰  
何如此解語花也陳鴻長恨歌傳玄宗駕幸華清宮內  
外命婦媚耀景從上心油然若有顧遇左右前後粉色  
如土詔高力士潛搜外宮得楊元琰女壽邸陸雲與兄

機書云君苗能文每見兄文輒欲焚其筆研左傳宣  
十二年告令尹改乘轅而北之詩國風執轡如組

追餞正輔表兄至博羅賦詩為別

孤臣南游墮黃菅君亦何事來收蠻艤舟蜚戶龍岡窟  
置酒椰葉枕柳間高談已笑衰語陋傑句尤覺清詩孱  
博羅小縣僧舍古我不忍去君忘還君應回望秦與楚  
夢涉漢水愁秦關我亦坐念高安客神游黃蘗參洞山  
何時曠蕩洗瑕謫與君歸駕相追攀梨花寒食隔江路  
兩山遙對雙煙鬟歸耕不用一錢物惟要兩腳飛孱顏

玉牀丹鏤記分我助我金鼎光爛斑

韓退之詩衛時龍戶集注即今蟬戶也謂採珠者一統志惠州有九龍岡在長樂吳都賦擯擲無柯柳葉無蔭南方草木狀椰樹葉如拼攔高五六丈無枝條高安縣隸筠州時子由分司南京筠州居住傳燈錄洪州黃蘗希運禪師筠州洞山良价禪師玉牀丹鏤見十八卷觀張師正所蓄辰砂詩注大丹祕契圖金鼎篇云金鼎者上應天下應地中應人民

再用前韻

樂天雙鬢如霜管始知謝遣素與蠻我兄綠髮蔚如故已了夢幻齊人間蛾眉勸酒聊爾耳處仲太忍茂弘孱



三杯徑醉便歸卧海上知復幾往還連娟六么趁蹋鞠  
杳眇三疊紫陽關酒醒夢斷何所有落花流水空青山  
忽驚鏡鼓發半夜明月不許幽人攀贈行無物惟一語  
莫遣瘴霧侵雲鬟羅浮道人一傾蓋欲繫白日留君顏  
應知我是香案吏他年許綴蓬萊班

晉書王敦字處仲王導字茂弘詩意用王愷使美人行  
酒事注已見蹋鞠字出史記蘇秦傳又見衛霍傳今之  
蹴鞠也劉向別錄曰蹴鞠黃帝所造六么曲名琵琶錄  
唐崑崙彈新翻羽調綠膏注綠膏即錄要也本自樂工  
進曲上令錄出要者乃以為名後又訛為六  
么也陽關三疊詳見十二卷和孔密州詩注

施註蘇詩卷三十五

欽定四庫全書

施註蘓詩卷三十六

宋 蘇軾 撰

施元之 原註

武進邵長蘅 刪補

詩四十八首

時在惠州作  
施註缺今補

真一酒

并引

米麥水三一而已此東坡先生真一酒也

撥雪披雲得乳泓蜜蠶又欲醉先生

公自注真一色味頗類予在黃州日

所醞蜜酒也

稻垂麥仰陰陽足器潔泉新表裏清曉日著顏

紅有暈春風入髓散無聲人間真一東坡老與作青州

從事名

遊博羅香積寺

并引白鶴故居園香積寺在惠州南博羅縣西山下

寺去縣七里三山犬牙夾道皆美田麥禾甚茂

寺下谿水可作碓磨若築塘百步閘而落之可

轉兩輪舉四杵也以屬縣令林抃使督成之

字抃

和天

二年流落鼃魚鄉朝來喜見麥吐芒東風搖波舞淨綠  
初日泣露酣嬌黃汪汪春泥已沒膝剌剌秋穀初分秧  
誰言萬里出無友見此二美喜欲狂三山屏擁僧舍小  
一谿雷轉松陰涼要令水力供臼磨與相地脉增隄防  
霏霏落雪看收麪隱隱疊鼓聞舂糠散流一吸雲子白  
炊裂十字瓊肌香豈惟牢九薦古味

公自注東哲餅賦  
饅頭薄持起搜牢

九要使真一流天漿詩成捧腹便絕倒書生說食真膏育

國語范蠡謂王孫雄曰故濱於東海之陂鼃鰻魚鼃之與處而鼃鰻之與同階柳子厚詩麥芒際天搖青波文選麥漸漸以擢芒謝靈運詩花上露猶泣白鷗故居圖三山者大北山象頭山白水山皆在水南一谿者即東江也在山之北柳州山水記泉大類轂雷鳴西奔漢武帝外傳太上之藥則有風實雲子金精玉液杜子美詩飯抄雲子白晉書何曾性奢豪每燕見不食大官所設帝輒命取其食蒸餅上不拆作十字不食也真一酒名按東晉餅賦有饅頭薄壯起溲牢丸之名而先生詩用作牢丸又自注中薄壯作薄持起溲作起搜又三十八卷真一酒歌亦用起搜字想別有所據未詳

次韵定慧欽長老見寄八首

并引

蘇州定慧長老守欽使其徒卓契順來惠州問予  
安否且寄擬寒山十頌語有璨忍之通而詩無島

可之寒吾甚嘉之為和八首

吳郡圖經續記定慧禪院本萬歲子院在

長洲縣東祥符中改今額傳燈錄天台寒山子  
者本無氏族始豐縣西七十里有寒明二巖以  
其於寒巖中居止故名有頌三百餘首傳布人  
間又三祖僧璨鏡智禪師五祖弘忍大滿禪師  
賈島初為僧名無本可即  
僧可明也舊云郊寒島瘦

左角看破楚南柯聞長膝鉤簾歸乳燕穴紙出癡蠅為

鼠常留飯憐蛾不點燈崎嶇真可笑我是小乘僧

左角用蠻觸事南柯用淳于棼事並已見左傳隱十二年滕侯薛侯來朝爭長卒長滕侯傳燈錄古靈神贊禪師見蜂子投紙牕求出師曰世界如許廣闊不肯出鑽他故紙驢年去遂有偈曰空門不肯出投窓也太癡百年鑽故紙未見出頭時韓退之詩癡如遇寒蠅李白書云白崎嶇歷落可笑人也傳燈錄圭峰云悟我空徧真之理而修者是小乘禪

鐵橋本無柱石樓豈有門舞空五色羽吠雲千歲根松花釀仙酒木客餽山殮我醉君且去陶云吾亦云

白鶴故居圖鐵橋峰在大石樓峯東大小二石樓在羅浮山下一統志五色雀出羅浮山貴人至則先翔舞先



生在儋州有五色雀詩見三十八卷續神仙傳朱孺子  
一日忽見二花犬相趨入枸杞叢下因異之尋掘得二  
枸杞根形狀如犬白樂天詩不知靈藥根成狗怪得時  
聞吠夜聲原化記有老人雪中訪崔豈真獻松花酒老  
人云花溫無味乃取  
一丸藥投之味頓別

羅浮高萬仞不看扶桑卑默坐朱明洞玉池自生肥從  
來性坦率醉語漏天機相逢莫相問我不記吾誰

白鶴故居圖朱明洞在麻姑峯  
之北又詳上卷遊羅浮山詩注

幽人白骨觀大士甘露滅根塵各清淨心境兩奇絕真  
源未純熟習氣餘陋劣譬如已放鷹中夜時掣絙

楞嚴經優婆塞沙陀白佛言觀不淨相生大厭離白骨  
微塵歸於空虛維摩經始在佛樹力降魔得甘露滅覺  
道成楞嚴經根塵同源縛脫無二又世間一切根塵陰  
處界等皆如來藏清淨本然張衡鷓鴣賦蒼鷹驚而受  
紕

誰言窮巷士乃竊造化權所見皆我有安居受其全戲

作一篇書千古發爭端儒墨起

一作宣

相殺予初本無言

閒居蓄百毒救彼跛與盲依山作陶穴掩此暴骨橫區  
區效一溉豈能濟含生力惡不已出時哉汝非爭

周禮醫師掌醫之政令聚毒藥以供醫事注毒五毒也  
疏藥之辛苦者又韓退之詩醫師加百毒詩大雅陶復

陶穴左傳宣十二年楚子曰今我使二國暴骨暴矣禮記大道之行力惡其不出於身也不必為己

少壯欲及物老閒餘此心微生山海間坐受瘴霧侵可

憐鄧道士攝衣問呻吟覆舟卻

一作吊

私渡斷橋費千金

按鄧道士名守安嘗造東新橋見下卷兩橋詩序

淨名毗耶中妙喜恒沙外初無往來相二土

徒故切

同一

在云何定慧師尚欠行腳債請判維摩憑一到東坡界

維摩經毗耶離城中有長者名維摩詰僧肇注云維摩詰秦言淨名也又佛言有國名妙喜佛號無動是維摩詰於彼國沒而來此生

二一作三月十九日携白酒鱸魚過詹使君食槐

葉冷淘

杜子美槐葉冷淘詩青青高槐葉采掇付中厨新麪來近市汁滓宛相俱云云

枇杷已熟粲金珠桑落初嘗艷玉蛆暫借垂蓮十分盞  
一澆空腹五車書青浮卯椀槐芽餅紅點冰盤藿葉魚  
醉飽高眠真事業此生有味在三餘

水經注劉白墮宿擅工釀採挹河流醞成芳耐慙食同  
枯枝之年排於桑落之辰故酒得其名霏雪錄河東桑  
落坊有井每至桑落時取水釀酒甚美庾信詩蒲城桑  
落酒灞岸菊花天王注槐芽餅取槐葉汁浸麪作餅即  
鮮碧色禮記少儀牛羊與魚之腥聶而切之為膾注云  
聶之言牒也先釐葉切之復報切之則成膾三國志注

董遇言為學當以三餘冬者歲之餘夜者日之餘陰雨者時之餘也

### 江漲用過韻

草木生故墟牛羊滿空瀆春江圍草市夜浪浮竹屋已  
連漲海白尚帶霍山綠坎離更休王魚鼈橫陵陸得非  
崑崙囚欲報陸渾魴行看北風競來救南國感長驅連  
山燒一埽含沙毒孤吟慙造化何時停倚伏當憐水旱  
氓不作舟車蓄江流儻席卷社酒期茅縮

房千里竹室記予環堵所棲率用竹以結其四周植者  
為柱楮撐者為椽楠破者為雷削者為障一統志霍山

在龍川縣有三百七十二峯按東江過龍川入惠州界故云周易坎為水離為火漢書音義五行有王相死因休廢即五行相勝之意也韓退之陸渾山火詩女丁婦士傳世婚一朝結讐奈後昆又月及申酉利復怨助女五龍從九鯢溺厥邑囚之崑崙注水火相配今火勝水故結讐然水生於申火死於酉故帝於此時令之報怨溺火官之邑而囚火官於崑崙也按此正中上句坎離休王之意左傳襄十八年晉人聞有楚師曠曰不害吾驟歌北風又歌南風南風不競又成十六年南國威射其元王中厥目山海經大荒南有蜮處水中含沙射人影中則成瘡史記早則資車水則資舟物之理也左傳僖四年爾貢包茅不入無以縮酒

連雨漲江二首

越井岡頭雲出山  
牂牁江上水如天  
牀牀避漏幽人屋

浦浦移家蜚子船  
龍卷魚蝦并雨落  
人隨雞犬上牆眠  
只應樓下平堦水  
長記先生過嶺年

史記西南夷傳牂牁江廣數里出番禺城下後漢南蠻傳楚遣將莊躋伐夜郎軍至且蘭牂船於岸而步戰既滅夜郎以且蘭有桡船牂牁處乃改其名為牂牁注繫船杙也亦作牂牁杜甫茅屋為秋風所破歌牀牀屋漏無乾處類書蜚人瀕海而居以舟為宅辨水色知龍居又曰龍人

急雨蕭蕭作晚涼  
臥聞榕葉響長廊  
微明燈火耿殘夢  
半濕簾帷浥舊香  
高浪隱牀吹甕盎  
閨風驚樹擺琳琅  
先生不出晴無用  
留向空堦滴夜長

嵇含南方草木狀榕樹南海桂林多有之葉如木麻實  
如冬青枝條最繁其蔭十畝柳子厚詩山城過雨百花  
盡榕葉滿庭鶯亂啼

四月十一日初食荔支

南村諸楊北村廬

公自注謂楊梅廬橘也

白華青葉冬不枯垂黃

綴紫煙雨裏特與荔支為先驅海山仙人絳羅襦紅紗  
中單白玉膚不須更待妃子笑風骨自是傾城姝不知  
天公有意無遣此尤物生海隅雲山得伴松檜老霜雪  
自困植枿羸先生洗盞酌桂醕冰盤薦此頰虬珠似聞



江鮓斫玉柱更洗河豚烹腹腴

公自注予嘗謂荔支厚味高格兩絕果中無比

惟江鮓柱河豚魚近之耳

我生涉世本為口一官久已輕蓴鱸人間

何者非夢幻南來萬里真良圖

臨海異物志楊梅其子大如彈丸正赤五月中熟司馬相如上林賦盧橘夏熟師古曰盧黑色也廣州記盧橘皮厚味酸大如柑至夏熟土人呼為盧橘張勳吳錄餘冬錄云相如作賦不知盧橘名枇杷按上林賦自有枇杷檉柿之文不應重出蔡君謨食荔枝詩絳衣仙子過中元別葉空枝去不還古今注中單襯衣也漢高祖始改名汗衫唐輿服志凡祀天地之服皆白紗中單左傳昭二十八年叔向欲取于申公巫臣氏其母曰夫有尤物足以移人苟非德義則必有禍禮記植梨鑽之莊子天運篇其猶祖黎橘柚耶其味相反而皆可于口韓退

之柿詩然雲燒樹火實駢金烏下啄頰虬卵臨海異物  
志玉珖柱美如珖玉晉安南異物名記肉柱膚寸美如  
珖玉即江瑤也一云江瑤即海月藝苑雜錄黃河豚水族  
之奇味本草吳越人春月甚珍貴之尤重其腹腴呼為  
西施乳禮記少儀冬右腴疏曰腴腹下  
也杜子美設贈歌偏勸腹腴愧年小

枕榔杖寄張文潛一首時初聞黃魯直遷黔南  
范淳父九疑也

睡起風清酒在亡身隨殘夢雨茫茫江邊曳杖枕榔瘦  
林下尋苗蕈撥香獨步儻逢勾漏令遠來莫恨曲江張  
遙知魯國真男子獨憶平生盛孝章

唐書劉禹錫傳作問大鈞謫九年等賦又叙張九齡為宰相建言放臣不宜與善地悲徙五谿不毛處議者以爲開元良善臣而卒無嗣豈攸心陰責最大雖他美莫贖耶欲感諷權近而憾不釋張九齡傳韶州曲江人時呼爲張曲江楊彪傳融謂曹操曰孔融魯國男子也會稽典錄盛憲字孝章有天下大名孫策欲誅之孔文舉與曹公書意欲曹公致書救之書未至而已誅矣初憲爲臺郎路逢童子容貌非常憲怪而問之曰魯國孔融憲異之乃載歸結爲兄弟

### 答周循州

蔬飯藜牀破衲衣掃除習氣不吟詩前生自一作似是盧

行者後學過呼韓退之未敢叩門求夜話時叨送米續

晨炊知君清俸難多輟且覓黃精與療饑

盧行者名慧能即曹溪六祖抱朴子內篇黃精一名救窮一名垂珠服花勝實服實勝根

與程正輔游碧落洞

空山不難到絕境未易名何時謫仙人來作鈞天聲

胸中幾雲夢餘地多一作方恢宏長庚與北斗錯落綴冠纓

黃公獻紫芝赤松餽青精谿山久寂寞請續離騷經

抱枝寒蛭咽繞耳飛蚊清謫仙撫掌笑笑此羽皇銘我頃

嘗獨游自適孤雲情君今又繼往霧雨愁青冥感君兄

弟意尋羊問初平玉牀分箭鏃不忍獨長生詩成輒寄  
我妙絕陶謝并孤鴻方避弋老驥猶在垆鳥獸如可羣  
永寄槁木形何山不堪隱飲水自修齡

曾子建與陳琳書披翠雲以為衣戴北斗以為冠高士  
傳四皓者角里先生綺里季夏黃公東園公也避秦逃  
入商洛山作歌曰莫莫高山深谷逶迤暉暉紫芝可以  
療饑真誥霍山有道者鄧伯原受青精石飯之法杜子  
美詩豈無青精飯使我顏色好按羽皇  
銘疑即用前卷自注山玄卿新宮銘事

六月十二日酒醒步月理髮而寢

羽蟲見月爭翾

一作翻

翻我亦散髮虛明軒千梳冷快肌

骨醒風露氣入霜蓬根起舞三人謾相屬停盃一問終  
無言曲肱薤簞有佳處夢覺瓊樓空斷魂

杜子美夏夜歎昊天出華月茂林延疎光仲夏苦夜短  
開軒納微涼虛明見纖毫羽蟲亦飛揚真誥太極緣經  
云髮當數櫛血液不滯髮根常堅李太白詩青天有月  
來幾時我今停盃一問之白樂天寄李蘄州詩笛愁春  
盡梅花裏簞冷秋生薤葉中拾遺記翟乾祐與人翫月  
人問月中何所有乾佑曰隨我手看之月規半圓瓊樓  
玉宇滿焉良久乃隱又先生有詞云祇  
恐瓊樓玉宇高處不勝寒亦同此意

荔支歎

十里一置飛塵灰五里一候兵火催顛坑仆谷相枕藉

知是荔支龍眼來飛車跨山鵲橫海風枝露葉如新採  
宮中美人一破顏驚塵濺血流千載永元荔支來交州  
天寶歲貢取之涪至今欲食林甫肉無人舉觴酌伯游

公自注漢永元中交州進荔支龍眼十里一置五里一  
候奔騰死亡懼猛獸毒蟲之害者無數唐羌字伯游為  
林武長上書言狀和帝罷之唐天寶  
中蓋取涪州荔支自子午谷路進入我願天公憐赤子

莫生尤物為瘡痍雨順風調百穀登民不饑寒為上瑞

集本無君不見武夷溪邊粟粒芽前丁後蔡相籠加自公

注大小龍茶始於丁晉公成於蔡君謨歐陽永叔開  
君謨進小龍團驚歎曰君謨士人也何至作此事爭

新買寵各出意今年鬪品充官茶

公自注今年閏中監司乞進關茶許之

吾君所乏豈此物致養口體何陋邪洛陽相君忠孝家

可憐亦進姚黃花

公自注洛下貢花自錢惟演始

李太白詩誰能駕飛車相從觀海外金樓子奇肱之民  
能為飛車兵書海鵬頭低尾高前大後小如旗之狀木  
華海賦魚則橫海之鯨王注鵬橫海言船也按首四句  
指漢橫海四句指唐交州記龍眼樹高五六丈似荔枝  
而小廣州記荔枝大如桂樹實如雞子甘而多汁謝承  
後漢書唐雎上書云伏見交趾七郡獻生龍眼等鳥驚  
風發南州土地炎熱惡蟲猛獸不絕於路至於觸犯死  
亡之害死者不可生來者猶可救也此二物升殿未必  
延年益壽云云後漢書和帝紀元興元年帝以唐雎言  
下詔曰遠國珍羞本以薦奉宗廟苟有傷害宜愛民之



本其敕大官勿復受獻按漢書曰元興先生詩云永元  
蓋末年改元即永元十七年也王注十五年誤張平子  
西京賦所惡成瘡痂武夷山在建州粟粒芽茶之極品  
者范希文闕茶歌年年春日東南來建溪水暖水微開  
溪邊奇花冠天下武夷仙人親手栽錢俶歸朝謚忠懿  
先生有表忠觀碑互見前三十四卷忠孝王注歐陽牡  
升譜姚黃者千葉黃  
花出於民姚氏家

### 江月五首

并引

嶺南氣候不常吾嘗云菊花開時乃重陽涼天佳  
月即中秋不須以日月為斷也今歲九月殘暑方  
退既望之後月出愈遲然予嘗夜起登合江樓或

與客游豐湖入栖禪寺扣羅浮道院登逍遙堂逮  
曉乃歸杜子美云四更山吐月殘夜水明樓此殆  
古今絕唱也因其句作五首仍以殘夜水明樓為  
韻

一更山吐月玉塔臥微瀾正似西湖上湧金門外看冰  
輪橫海闊香霧入樓寒停鞭且莫上照我一杯殘

二更山吐月幽人方獨夜可憐人與月夜夜江樓下風

枝夕

一作久

未停露草不可藉歸來掩闥臥唧唧蟲夜話

三更山吐月栖鳥亦驚起起尋夢中遊清絕正如此駢  
雲掃衆宿俯仰迷空水幸可飲我牛不須違洗耳

四更山吐月皎皎為誰明幽人赴我約坐待玉繩橫野  
橋多斷板山寺有微行今夕定何夕夢中遊化城

春秋元命苞玉衡北兩星為玉繩星謝朓詩玉  
繩低建章杜子美詩不違銀漢落亦伴玉繩橫

五更山吐月牕迴室幽幽玉鉤還掛戶江練卻明樓星  
河澹欲曉鼓角冷知秋不眠翻五詠清切變蠻謳

韓退之詩蟲鳴室幽幽月吐牕炯炯鮑昭月詩始  
出西南樓纖纖如玉鉤謝玄暉詩澄江淨如練

聞正輔表兄將至以詩迎之

生逢堯舜仁得作嶺南游雖懷楚然喜豈免跼墮憂莫  
雨侵重腿曉煙騰鬱攸朝槃見蜜唧夜枕聞鷓鴣幾欲  
烹鬱屈固嘗饌鉤輈舌音漸獠變面汗嘗駢羞賴我存  
黃庭有時仍丹丘目聽不任耳踵息殆廢喉稍欣素月  
夜遂度黃茅秋我兄清廟器持節瘴海頭蕭然三家步  
橫此萬斛舟人言得漢吏天遣活楚囚惠然再過我樂  
哉十日留但恨參語賢忽潛九原幽萬里儻同歸兩鰥

當對稷

公自注執喪婦已三年矣正輔近亦有亡嫂之戚故云

強歌非真達何必

師莊周

楚然足音出莊子跼墮用後漢馬援事並已見左傳成  
六年韓獻子曰郇瑕氏之地其惡易覲易覲則民愁民  
愁則墊隘于是乎有沈溺重腿之疾蜜唧即鼠胎飼之  
以蜜釘筵上獠民喜食之互詳下卷聞子由瘦詩注嶺  
表異錄鴉一名鵯鵯夜飛晝伏能拾人爪甲以為凶凶  
則鳴于屋上又名鬼車韓退之南食詩惟蛇舊所識實  
憚口眼猥開籠聽其去鬱屈尚不平又陸龜蒙苦熱詩  
蛇煩爭鬱屈蟹躁實郭索鉤輒鷗鵠聲也韓退之詩鷗  
鵠鉤輒猿叫歇李羣玉詩方穿詰屈崎嶇路又聽鉤輒  
格磔聲南越志鷗鵠肉白而脆味勝雞雉韓退之南食  
詩腥臊始發越吞咀面汗駢楚辭遠遊仍羽人于丹丘  
兮留不死之舊鄉列子老聃之弟子有亢倉子者得聃

之道能以耳視而目聽莊子大宗師至人之息以踵衆人之息以喉再見唐書李珣傳為殿中侍御史宰相韋處厚曰清廟之器非擊搏才柳子厚鐵爐步志江之游凡舟可縻而上下者曰步九國志王審知聞徐寅名辟居幕下寅不樂一旦拂衣去曰丈尺之水前波後堰焉能容萬斛之舟乎王注漢吏指正輔楚囚先生自謂也漢書楊敞傳霍光遣田延年報敞以廢昌邑王事敞汗流浹背徒唯唯而已敞夫人遽從東廂與延年參語許諾注三人共言故云參語

再和

稚川真長生少從鄭公游孝章偶不死免為文舉憂餘齡會有適獨往豈相攸由來警露鶴不羨撮蚤鷗願加

視後鞭同駕躅空輶寧食墮齒董勿憶齊眉羞何時遂  
縱壑歸路同首丘東岡松柏老西嶺橘柚秋著意尋彌  
明長頸高結喉無心逐定遠燕領飛虎頭君方卒功名  
一汎范蠡舟我亦霑霑渥漸解鍾儀囚寧須張子房萬  
戶自擇留猶勝嵇叔夜孤憤甘長幽南牕可寄傲北山  
早歸耨此語君勿疑老彭跨商周

晉書葛洪傳從祖玄吳時學道得仙以其煉丹祕術授  
弟子鄭隱洪就隱學悉得其法盛孝章注見本卷詩大  
雅為韓偓相攸箋云相視攸所也周處風土記白鶴性  
警至八月露降流於草木上滴滴有聲則鳴莊子秋水

篇鴟鵂夜撮蚤察毫末畫出瞋目而不見丘山視後鞭  
亦用莊子語已見唐逸史蔡少霞夢為蒼龍溪王寫太  
皇真訣記得四句云昔乘魚車今履瑞雲躅空仰塗綺  
絡輪囷互見三十五卷公自注爾雅齧苦董也本草一  
種黃花者有毒殺人即毛芹也又烏頭苗一名董有毒  
唐書張果傳帝密語高力士朕聞飲董無苦真仙人也  
因取以飲果三進頽然如醉顧曰非佳酒也頃視菹燠  
縮顧左右取鐵如意擊墮之更出藥傳其斷良久復生  
齊省意指鰥居也禮記狐死正首丘言不忘本也漢書  
留侯世家高祖自擇齊二萬戶欲以封張良良曰始臣  
起下邳與上會留臣願封留足矣世本彭祖在商為守  
藏史在周為柱下史年八百歲又神仙傳彭祖壽八百  
代歷三

同正輔表兄游白水山

白鶴故居圖白水山羅浮山之西瀑布在焉



偉哉造物真豪縱攫土搏沙為此弄擘開翠峽走雲雷  
截破奔流作潭洞因隨化人履巨迹得與仙兄躡飛鞚  
曳杖不知巖谷深穿雲但覺衣裘重坐看鷲鳥救一作  
投

霜葉知有老蛟蟠石甕金沙玉礫粲可數古鏡寶奩寒  
不動念兄獨立與世踈絕境難到惟我共永辭角上兩  
蠻觸一洗胸中九雲夢浮來山高回望失武陵路絕無  
人送筠籃擷翠爪甲香素綆分碧銀鉶凍歸路霏霏湯  
谷暗野堂活活神泉湧解衣浴此無垢人身輕可試雲

閒鳳

莊子大宗師偉哉夫造物將以予為此拘拘也再見按  
翠峽二句指瀑布化人句指佛迹也山有佛迹崖見前  
卷杜子美詩黃門飛鞚不動塵韓退之詩林柯有脫葉  
欲墮鳥驚救古詩淮南王篇金瓶素縷汲寒漿王褒湯  
泉碑湯谷揚波神泉  
愈疾山有湯泉故云

與正輔遊香積寺

越山少松竹常苦野火厄此峯獨蒼然感荷佛祖力茯  
苓無人採千歲化琥珀幽光發中夜見者惟木客我豈  
無長鑱真贗苦難識靈苗與毒草疑似在毫髮把翫竟

不食棄置長太息山僧類有道辛苦嘗谷汲我慚作機  
舂鑿破混沌穴幽尋恐不繼書板記歲月

杜子美詩長鑱長鑱白木柄韓退之詩前計頃乖張居  
然見真履漢書地理志號會之地土隈而險山居谷汲  
王注傳曰杵臼  
之智不及機舂

### 次韻正輔同遊白水山

祇知楚越為天涯不知肝膽非一家此身如綫自縈繞  
左旋右轉隨縲車誤拋山林入朝市平地咫尺千褒斜  
欲從稚川隱羅浮先與靈運開永嘉首參虞舜款韶石

次謁六祖登南華仙山一見五色羽雪樹兩摘南枝花

赤魚白蟹

一作白魚赤蟹

箸屢下黃柑綠橘蓮常加糖霜不待

蜀客寄荔支莫信閩人誇恣傾白蜜收五稜細斲黃土

栽三桠

公自注正輔分人參歸種韶陽來詩本用砵字惠州無書不見此字所出故且從本奉和

朱

明洞裏得靈草翩然放杖凌蒼霞豈無軒車駕熟鹿亦

有鼓吹號寒蛙仙人勸酒不用勺石上自有樽罍窪徑

從此路朝玉闕千里莫遣毫釐差故人日夜望我歸相

迎欲到長風沙豈知乘槎天女側獨倚雲機看織紗世

閒誰似老兄弟篤愛不復相疵瑕相携行到水窮處庶  
幾一見留子嗟千年枸杞嘗夜吠無數草棘工藏遮但  
令凡心一洗濯神人仙藥不我遐山中歸來萬想滅豈

復回顧雙雲

飛一作鴉

莊子德充符自其異者視之肝膽楚越也白樂天詩遠  
窮平谷險舉足劇褒斜西都賦注褒斜谷在長安城西  
南山曰褒北曰斜長四百七十里謝靈運傳在永嘉登  
山臨水佳處無不游嘗自始寧南山伐木開徑直入臨  
海周禮邁人掌肆邁之實加邁之實蒞茨栗脯物產志  
糖霜出遂寧宋時入貢荔支譜廣南及梓夔之間所出  
大率早熟其精好者僅比閩中之下品東觀漢記上賜  
朱祐白蜜一石蘇頌本草圖經雍洛間有梨花蜜白如

凝脂嶺表錄瀧州山中多紫石英其大小皆五稜兩頭如箭鏃煮水飲之煖而無毒三桮見三十四卷寄紫園參詩注又互見本卷人參詩注李白長干行相迎不道遠直至長風沙同安志長風沙鎮在懷寧縣東一百二十里王維詩行到水窮處坐看雲起時雙雲鴉似指失偶事先生前詩有兩鰥之語玩洗凡心及萬想滅二語可見雲鴉即所云雲鬢鴉鬢也作飛鴉解非

# 和子由次月中梳頭韵

子由詩序云轍有白髮近二十年矣然止百餘

莖不增不減度州道人王正彥教令拔去以真水火養之恐不復更生從其言已數月而白髮不出更年歲不見豈真不生邪子瞻兄示我月中梳頭詩戲次來韻言拔白之驗詩曰水上有車車自翻懸流如線垂前軒霜蓬已枯不再綠有客勸我拔其根枯根一去紫

苒茁珍重已試幽人言紛紛華髮不足道當返六十過去魂

夏畦流膏白雨翻北牕幽人臥羲軒風輪曉長春笋節

露珠夜上秋禾根

公自注或為予言草木之長常在昧明間早作而伺之乃見其拔起數寸

竹笋尤甚又夏秋之交稻方含秀黃昏月出露珠起于其根累累然忽自騰上若有推之者或入于莖心或垂于葉端稻乃秀實驗之信然此二事與子由養生之說契故以此為寄從來白髮有公道

始信丹經非妄言此身法報本無二他年妙絕無形魂

公自注傳燈錄有形神俱妙者乃不復有解化之事

杜牧之詩公道世間惟白髮法報法身報身也字見華嚴合論

十一月九日夜夢與人論神仙道術因作一詩  
八句既覺頗記其語錄呈子由弟後四句不甚  
明了今足成之耳

析塵妙質本來空

公自注夢中於此句  
若了然有所得者

更積微陽一線

功照夜一燈長耿耿閉門千息自濛濛  
養成丹竈無煙火點盡人間有暈銅  
寄語山神停伎倆不聞不見我何窮

楞嚴經又鄰虛塵析入空者用幾色相合成虛空傳燈  
錄壽州道樹禪師得法於北宗秀在壽州三峯山結茅



而居有一野人常化作佛及菩薩羅漢天仙等形或放神光或呈聲響如此涉十年後寂無形影師告衆曰野人作多色伎倆眩惑於人只消老僧不見不聞伊伎倆有窮吾不見不聞無盡

章質夫送酒六壺書至而酒不達戲作小詩問之

白衣送酒舞

一作侮

淵明急掃風軒洗破觥豈意青州六

從事化為烏有一先生空煩左手持新蟹漫繞東籬嗅落英南海使君今北海定分百榼餉春耕

王注章時為廣帥孔融為北海相嘗有樽中酒不空語故云

小圃五詠

人參

上黨天下脊遼東真井底玄泉傾海腴白露灑天醴靈

苗此孕毓肩股

一作股

或具體移根到羅浮越水灌清泚

地殊風雨隔臭味終祖禰青楹綴紫萼圓實墮紅米窮

年生意足黃土手自啟上藥無炮炙齧齧盡根柢開心

定魂魄憂恚何足洗靡身輔吾生

一作軀

既食首重稽

本草人參生上黨山谷及遼東釋名人參一名海腴春秋運斗樞瑤光星化而為人參故又名神草隋書五行

志高祖時上黨人宅後每夜有人呼聲求之不得去宅一里所見人參枝葉異常掘之得人參一如人體四肢畢備本草圖經人參初生小者一極兩葉年深者生四極各五葉中心一莖有花細小如粟藥如絲紫白色秋後結子如大豆青生熟紅白落藥性論人參主安精神定魂魄開心益智

## 地黃

地黃飼老馬可使光鑒人吾聞樂天語喻馬施之身我衰正伏櫪垂耳氣不振移栽附沃壤蕃茂爭新春沈水得穉根重湯養陳新投以東阿清和以北海醇崖蜜助甘冷山薑發芳辛融為寒食餠嚙作瑞露珍丹田自宿

火渴肺還生津願餉內熱子一洗胸中塵

白樂天採地黃者詩凌晨荷鋤去薄暮不盈筐攜來朱  
家門賣與白面郎與君啖肥馬可使照地光願易馬殘  
粟救此苦饑腸本草地黃宜肥壤虛地則根大而多汁  
本草陶隱居云阿膠出東阿其用皮有老少則膠有清  
濁又崖蜜生南方巖嶺閒入藥最勝杜子美成州詩崖  
蜜亦易求釋名饒之清者為餹纂異記甘珍逢三書生  
曰我有瑞露珍釀百花中與飲甘香可愛  
天寶遺事楊貴妃含玉嚙津以解肺渴

枸杞

神藥不自閼羅生滿山澤日有牛羊憂歲有野火厄越  
俗不好事過眼等茨棘青萸春自長絳珠爛莫摘短籬

護新植紫筍生臥節根莖與花實收拾無棄物大將玄  
吾鬢小則餉我客似聞朱明洞中有千歲質靈虬或夜  
吠可見不可索仙人儻許我借杖扶衰疾

詩小雅楚楚者茨言抽其棘本草枸杞冬採根春夏採  
葉秋採莖實又枸杞久服輕身不老一名仙人杖劉禹  
錫枸杞井詩枝繁本是仙人杖根老能成瑞  
犬形詩國風無使虬也吠又靈虬注見本卷

### 甘菊

越山春始寒菊晚愈好朝來出細粟稍覺芳歲老孤  
根蔭長松獨秀無衆草晨光雖照耀秋雨半摧倒先生

臥不出黃葉紛可掃無人送酒壺空腹嚼珠寶香風入  
牙頰楚些發天藻新萸蔚已滿宿根寒不槁揚揚美芳

蝶生死何足道頗訝昌黎公

一作翁

恨爾生不早

先生記菊帖云嶺南地煖而菊獨後開考其理菊性介  
烈須霜降乃發而嶺海常以冬至微霜故也吾以十月  
望與客泛菊作重九書此為記唐太宗殘菊詩階蘭凝  
曙霜岸菊照晨光范至能譜序惟甘菊一種可食仍入  
藥餌楚些注已見神仙傳王母云神仙之書受而不敬  
是謂慢天藻韓退之秋懷詩鮮鮮霜中菊既晚何用好  
揚揚美芳蝶爾生還不早

意以

伏波飯薏苡禦瘴傳神良能除五谿毒不救讒言傷讒  
言風雨過瘴癘久亦亡兩俱不足治但愛草木長草木  
各有宜珍產駢南荒絳囊懸荔支雪粉剖桄榔不謂蓬  
荻姿中有藥與糧春為茨珠圓炊作菰米香子美拾橡  
栗黃精誑空腸今吾獨何者玉粒照座光

鄴道元水經注武陵有五谿謂雄谿柵谿西谿元谿辰  
谿謂之五谿蠻後漢馬援傳初援在交趾常餽薏苡以  
勝瘴氣軍還載之一車及卒後有譖之者以為前所載  
皆明珠文犀再見蔡君謨荔枝詩厚葉纖枝雜絳囊使  
君分寄驛人忙臨海異物志桄榔皮中有白粉似稻米  
及麥麵可作餅餌崔豹古今注茨一名雁頭廣雅難頭

謂之獲芡歐陽永叔食雞頭詩爭先園客採新苞剖蚌  
得珠從海底本草薏苡米白色如糯米呼為薏珠子春  
熟炊為飲食氣味如麥飯乃佳宋玉賦主人之女為臣  
炊彫胡之飯註彫胡菰米也廣雅菰蔣其米謂之彫胡  
杜子美寓居同谷縣詩歲拾橡栗隨狙公又  
黃精無苗山雪盛短衣數挽不掩脰再見

### 雨後行菜

夢回聞雨聲喜我菜甲長平明江路濕  
竝岸飛雨漿天公真富有乳膏瀉黃壤  
霜根一番滋風葉漸俯仰未仕

筐筥載已作杯盤

一作按

想艱難生理窄一味敢專饗小

摘飯山僧清安寄真賞芥藍如茵萐脆美牙頰響白菰



類羔豚冒土出踏掌誰能視火候小竈當自養

詩國風于以盛之維筐及筥杜子美詩自鉏稀菜甲小  
摘為親情劉恂嶺南異物志南土芥高五六尺芥心嫩  
臺謂之芥藍陳仁玉菌譜芝菌最為上品葷凡九種味  
極香美海錄碎事江東人呼地菌為土圀陸佃埤雅菘  
葉如蕪菁性凌冬晚凋故曰菘俗謂之  
白菜左傳宣二年宰夫胹熊蹯不熟

殘臘獨出二首

幽尋本無事獨往意自長釣魚豐樂橋採杞逍遙堂羅  
浮春欲動雪日有清光處處野梅開家家臘酒香路遙  
眇道士疑是左元放我欲從之語恐復化為羊

杜子美詩江路野梅香神仙傳左慈字元放徐墮有道  
術居丹徒慈過之墮門下客欺慈云徐公不在慈便去  
客報徐公有一老翁眇目吾欺之云公不在  
矣公曰咄咄此是左公過我化羊事屢見

江邊有微行詰曲背城市平湖春草合步到栖禪寺堂  
空不見人老稚掩闕睡所營在一食食已寧復事客來  
豈無得施子靜掃地風松獨不靜送我作鼓吹

詩國風邇彼微行陶淵明詩  
傾身營一飽少許便有餘

新年五首

紹聖三年先生年六十一在惠州即  
古白鶴基始營新居故有結茅來此

住之  
句

曉雨暗人日春愁連上元水生挑菜渚煙濕落梅村小  
市人歸盡孤舟鶴踏翻猶堪慰寂寞漁火亂黃昏

荆楚歲時記正月七日謂  
之人日以陰晴卜豐耗

北渚集羣鷺新年何所之盡歸喬木寺分占結巢枝生  
物會有役謀身各及時何當禁畢弋看引雪衣兒

江淹擬雜體詩問君亦何為百年會有役談苑李昉五  
禽呼鷺為雪客天寶遺事楊貴妃鸚鵡名雪衣娘詩借  
用其  
字耳

海國空自煖春山無限清冰谿結一作瘴雨雪茵到江

城更待輕雷發先催凍笋生豐湖有藤菜似可敵蓴羹

一統志豐湖在惠州府城西廣十里有漱玉灘點翠洲諸勝中產藤菜王注先生嘗言豐湖有燕脂藤味滑美

蓴

小邑浮橋外青山石岸東茶槍燒後有麥浪水前空萬戶不禁酒三年真識翁結茅來此住歲晚有無同

茶譜蘄州園黃茶有一槍兩旗之號

荔子幾時熟花頭今已繁採春先揀樹買夏欲論園居士常携客參軍許叩門明年更有味懷抱帶諸孫

二月八日與黃燾僧曇穎過逍遙堂何道士宗  
一問疾

安心守玄牝閉眼覓黃庭問疾來三士澆愁有半餅風  
松時落藥病鶴不梳翎樽空我歸去山月照君醒

次韻高要令劉湜峽山寺見寄

新聞妙無多舊學閑可束猶當隱季主未遽逃梅福空  
腸吐餘思靜似蠶綴族寸田結初果秀若銅生綠荊棘  
掃誠盡穠棗憂不熟高人寧鑄金下士乃服玉君看嶺

嶠隘我欲巾笥蓄曾攀羅浮頂亦到朱明谷旋觀真歷  
塊歸臥甘破屋故人老猶仕世味薄如穀偶從越女笑  
不怕蠻江浴鷺聞尺書到喜有新詩辱應憐五管客曹  
作八州督骨銷讒口鏐膽破獄吏酷隴雲不易寄江月  
乃可拘遙知清遠寺不稱空明腹塞驢步武碎短瑟絃  
柱促仰看泉落珮俯聽石響轂千峯瀉清駛一往無回  
躅狂雷失晤語過電不容目要知僧長饑正坐山少肉  
人閒無南北蝸角空出縮仇池九十九

公自注仇池有  
九十九泉余嘗

夢至  
有詩  
嵩少三十六  
公自注子由近買田陽翟北望嵩少甚近  
天人同一夢仙

凡無兩錄陋邦真可老生理亦羸足便回熱天焰長作

照海燭

公自注黃魯直寄詩云蓮花合裏一寸燭北馬海中燒百川魯直蓋近有得也

史記日者傳司馬季主楚人也卜于長安市本草生銅皆有青蓋銅之精華也抱朴子服玉當得璞玉以屑與水服之令人不死北史李預傳得餐玉之法乃採訪藍田掘得百枚作屑食之經年有效韓退之詩吾老世味薄又洪濤春天禹穴幽越女一笑三年留舊唐書永徽後以廣柱容邕安南皆隸廣府謂之五府節度使名嶺南五管又韓退之詩五管徧歷無賢侯王注引莊子謬晉書陶侃字士行嘗如廁見一人朱衣介幘敝袂曰君後當為公位至八州都督按先生有詩云八州憐我往來頻即紀實也史記鄒陽上梁王書衆口鑠金積毀銷

骨南史王融矯詔立竟陵王子良太學生魏準鼓成其事及融誅準懼而死舉體皆青時以為膽破于良史詩掬水月在手韓退之詩雷驚電激語難間傳燈錄司馬頭陀自湖南來百丈謂之曰老僧欲住鴻山可乎對曰鴻山奇絕可聚千五百衆然非和尚所住百丈云何謂也對云和尚是骨人彼是肉山設居之徒不盈于百矣西京賦光焰燭天庭韓退之詩居然妄推讓見謂熱天焰

施註蘇詩卷三十六



欽定四庫全書

施註蘓詩卷三十七

宋 蘇軾 撰

施元之 原註

武進邵長蘅 刪補

詩五十一首

起在惠州洎紹聖  
丁丑再貶儋耳作

食荔枝二首

并引

惠州太守東堂祠故相陳文惠公堂下有公手植荔枝一株郡人謂之將軍樹今歲大熟賞啖之餘下逮吏卒其高不可致者縱猿取之

丞相祠堂下將軍大樹旁炎雲駢火寶瑞露酌天漿爛紫垂先熟高紅挂遠揚分甘徧鈴下也到黑衣郎

杜子美蜀相詩丞相祠堂何處尋後漢馮異傳每所止舍常獨屏樹下軍中號大樹將軍韓退之游青龍寺詩然雲燒樹火寶駢詩幽風取彼斧斯以伐遠揚注遠枝揚起也漢司馬遷傳李陵素與士大夫絕甘分少能得人之死力晉王羲之傳有一味之甘割而分之不敢專饗羊祜傳鈴閣之下侍衛不過數十人宣室志張長史

質凶屋以居覩黑衣人樹上擲  
瓦見擊其弟射殺之乃猿也

羅浮山下四時春  
盧橘楊梅次第新  
日啖荔枝三百顆  
不辭長作嶺南人

鄭熊番禺離編余在南中五  
年每食荔枝幾與飯相半

和子由盆中石菖蒲忽生九花

春蒐秋英兩須臾  
神藥人間果有無  
無鼻何由識蒼苔  
有花今始信菖蒲  
芳心未飽兩蛺蝶  
寒意知鳴幾蟬蛄  
記取明年十二節  
小兒休更鬬霜鬢

本草陶隱居補註云真葛蒲葉有脊四月五月亦作小  
釐花也南史梁武帝母張皇后見之曰見葛蒲花者當  
富貴因取吞之生武帝本草圖經葛蒲亦有一寸十二  
節者張籍葛蒲詩石上生葛蒲一本十二節仙人勸我  
食令我頭  
青面如雪

遷居

并引

吾紹聖元年十月十二日至惠州寓合江樓是月  
十八日遷於嘉祐寺二年三月十九日復遷於合  
江樓三年四月二十日復歸於嘉祐寺時方卜築  
白鶴峰之上新居成庶幾其少安乎

前年家水東回首夕陽麗去年家水西溼面春雨細  
東西兩無擇緣盡我輒逝今年復東徙舊館聊一憩  
已買白鶴峯規作終老計長江在北戶雪浪舞吾砌  
青山滿牆頭髮髮

烏果切

鬢幾雲髻雖慚抱朴子金鼎陋

蟬蛻猶賢柳州廟俎薦丹荔吾生本無待俯仰了  
此世念念自成劫塵塵各有際下觀生物息相吹等  
蚊蚋

劉禹錫詩髮鬢雲鬟宮樣粧古樂府頭上阿墮髻音義  
並同謂髮美貌晉葛洪傳所著書言黃白之事緘之金

匱自號抱朴子因以名書後忽坐至日中兀然若睡而卒舉尸入棺甚輕如空衣世以為尸解得仙云又云上士舉形昇虛謂之天仙中士遊於名山謂之地仙下士先死後蛻謂之尸解仙韓退之羅池廟碑羅池者故刺史柳侯廟也其詞曰荔子丹兮蕉黃雜肴蔬兮進侯堂續仙傳丁約謂韋子威曰郎君得道尚隔兩塵子威問其故約曰儒謂之世釋謂之劫道謂之塵莊子逍遙遊野馬也塵埃也生物之以息相吹也

兩橋詩

并引

惠州之東江谿合流有橋多廢壞以小舟渡羅浮道士鄧守安始作浮橋以四十舟為二十舫鐵鎖石碇隨水漲落榜曰東新橋州西豐湖上有長橋

屢作屢壞栖禪院僧希固築進兩岸為飛樓一作閣

九間盡用石鹽木堅若鐵石榜曰西新橋皆以紹

聖三年六月畢工作二詩落之

東新橋

羣鯨貫鐵索背負橫空霓首搖翻雪江尾挿崩雲谿機  
牙任信縮漲落隨高低輓轡卷巨索青蛟挂長堤奔舟  
免狂觸脫筏防撞擠一橋何足云謹傳廣東西父老有  
不識喜笑爭攀躋魚龍亦驚逃雷電生馬蹏嗟此病涉

久公私困留稽姦民食此險出沒如鳬驚似賣失船壺  
如去登樓梯不知百年來幾人隕沙泥宜知濤瀾上安  
若堂與閨往來無晨夜醉病休扶攜使君飲我言妙割  
無牛雞不云二子勞歎我捐腰犀公自注二士造橋  
予嘗助施犀帶我  
亦壽使君一言聽扶藜常當修未壞勿使後噬臍

鵬冠子學問篇中流失船一壺千金遯齋閒覽壺乃今  
所謂浮環者凡渡江海必預備浮環以虞風濤覆溺之  
患其形如環而空中用帛為帶挂之項上出兩手以按  
之則浮而不溺可以待救至今浙人呼為壺後漢劉表  
傳表子琦與諸葛亮謀自安之術亮初不對後乃共升  
高樓因令去梯語亮云云世說殷浩廢後恨簡文曰上



人著百尺樓上僮梯將去鄭審天寶故事楊國忠本張  
易之子天授中易之愚幸無比每歸私第詔令居樓上  
仍去梯母恐絕嗣乃令女奴駢珠上樓遂  
生國忠左傳莊六年若不早圖後君噬臍

### 西新橋

昔橋木千柱挂湖如斷霓浮梁陷積淖破板隨奔谿笑  
看遠岸沒坐覺孤城低聊因三農隙稍進百步隄炎州  
無堅植潦水輕推擠千年誰在者鐵柱羅浮西獨有石  
鹽木白螳不敢躋似開銅駝峯如鑿鐵馬蹄岌岌類鞭  
石山川非會稽嗟我久閣筆不書紙尾鷺蕭然無尺箠

一構飛空梯百夫下一杙椽此百尺泥

公自注橋柱石礫之下皆有堅

木椽入泥中文餘謂之頂椿

探囊賴故侯寶錢出金閨

公自注子由之婦史頃入

內得賜黃金錢數千以助施

父老喜雲集簞壺無空攜三日飲不散

殺盡西村雞似聞百歲前海近湖有犀

公自注橋下舊名鰐湖蓋常有

鮫鰐之類那知陵谷變枯瀆生芟藜後來勿忘今冬涉水過

臍

漢韋玄成傳天雨淖注云淖泥也會稽錄秦始皇作石橋欲過海觀日出處有神人驅石下海石去不速神輒鞭之流血三齊畧記亦云法帖中有王氏一帖最後大書一驚字相傳此帖之珍所酬至五十餘萬云爾雅載

謂之杙  
注槩也

悼朝雲

并引

紹聖元年十一月戲作朝雲詩三年七月五日朝  
雲病亡於惠州墓之栖禪寺松林中東南直大聖  
塔予既銘其墓且和前詩以自解朝雲始不識字  
晚忽學書羸有楷法蓋嘗從泗上比丘尼義冲學  
佛亦略聞大義且死誦金剛經四句偈而絕

先生於朝

雲墓前作六如亭蓋取經中如  
夢幻泡影如露亦如電之語

苗而不秀豈其天不使童烏與我玄駐景恨無千歲藥  
贈行惟有小乘禪傷心一念償前債彈指三生斷後緣  
歸臥竹根無遠近夜燈勤禮塔中仙

揚子育而不苗者吾家之童烏乎九齡而與我玄文按  
此言朝雲所生之子幹兒未百日而亡也杜子美少年  
行共醉終  
同卧竹根

丙子重九二首

三年瘴海上越嶠真我家登山作重九蠻菊秋未花惟  
有黃茅浪堆壠生坳窠蜚酒蘖衆毒酸甜如梨楂何以

侑一樽鄰翁餽鼃蛇亦復強取醉歡謠雜悲嗟今年吁  
惡歲僵仆如亂麻此會我雖健狂風卷朝霞使我如霜  
月孤光挂天涯西湖不欲住暮樹號寒鴉

西湖惠州西湖也  
朝雲墓在湖上

窮途不擇友過眼如亂雲餘子誰復數坐閱兩使君共  
飲去年堂俯看秋水紋此水與此人相追兩汙汙老去  
各休息造物嗟長勤佳哉此令節不惜與子分何以娛  
我客遊魚在清瀆水師三百指鐵網欲掩羣獲多雖一

快買放尤可欣此樂真不朽明年我歸耘

白鶴峰新居欲成夜過西鄰翟秀才二首

林行婆家初閉戶翟夫子舍尚留關連娟缺月黃昏後  
縹緲新居紫翠間繫悶豈無羅帶水割愁還有劒鉞山  
公自注韓退之云水作青羅帶山如碧玉簪柳子厚  
云海上升峯若劒鉞秋來處處割愁腸皆嶺南詩也中  
原北望無歸日鄰火村舂自往還

甕間畢卓防偷酒壁後匡衡不點燈待鑿平江百尺井  
要分清署一壺冰佐卿恐是歸來鶴次律寧非過去僧

他日莫尋王粲宅夢中來往本何曾

晉畢卓盜飲注已見西京雜記匡衡好讀書家貧無油  
燭乃鑿鄰壁映光廣輿記天寶中玄宗重陽日獵沙苑  
有孤鷗飛帝射之中戴箭西南而去益州道觀第一院  
有青城山道士徐佐卿寄寓一日自外持一箭歸曰吾  
行山中為飛矢所加因挂箭於壁書月日且言後年箭  
主到此付之及玄宗幸蜀至觀見之乃沙苑縱獵之日  
所射箭也廣德神異記亦云仍云觀即明月觀房琯字  
次律前世為僧事再見杜子美詩應同王粲宅留井硯  
前山

次韵子由所居六詠

堂前種山丹錯落馬腦盤堂後種秋菊碎金收辟寒草

木如有情慰此芳歲闌幽人正獨樂不知行路難

王子年拾遺記魏明帝時昆明國貢嗽金鳥常吐金屑如粟此鳥畏霜雪乃起小屋處之名辟寒臺宮人爭以所吐金為釵飾謂之辟寒金故相嘲曰不得辟寒金那得聖人心西陽雜俎亦云

詩人故多感花發憶兩京石榴有正色玉樹真虛名  
粲秋菊花卓為霜中英萼照重九纈藥兩鮮明

杜子美立春詩春日春榮細生榮忽憶兩京梅發時漢揚雄甘泉賦翠玉樹之青蔥按子由詩云後庭荏草盛憐爾計興亡注云矮難冠即玉樹後庭花故此和章及之

幽居有古意義井分西牆誰言三伏熱止須一杯涼先



生坐忍渴羣囂自披猖衆散徐酌飲逡巡味尤長

韓退之詩紛紛百家起詭恠相披猖晉阮瞻傳瞻常羣行冒熱渴甚逆旅有井衆人競趨之瞻獨逡巡在後須飲者畢乃進其夷退無競如此

先生飯土塼無物與劉叉何以娛醉客時與砌下花井水分西鄰竹陰借東家蕭然行腳僧一身寄天涯

史記秦始皇紀二世曰吾聞之韓子曰堯舜採橡不刮茅茨不剪飯土塼啜土粥雖監門之養不穀於此唐韓愈傳劉叉持愈數斤金去再見

東齋手種柏今復幾尺長知有桓司馬榛茅為遮藏近

聞南臺松新枝出餘僵年來此懷抱豈復一作敢驚凡亡

史記孔子適宋與弟子習禮大樹下宋桓司馬魋欲殺孔子拔其樹孔子遂去凡亡出莊子田子方篇詳見二

十二卷王仲

父哀辭注

新居已覆瓦無復風雨憂檻栽與籠竹小詩亦可求尚  
欲煩貳師刺山出飛流應須鑿百尺兩綆載一牛

杜子美堂成詩檻林礙日吟風葉籠竹和烟滴露梢又  
有與何十少府覓檻栽從韋二明府覓綿竹詩後漢耿  
恭傳匈奴擁絕澗水恭於城中穿井十五丈不得水恭  
歎曰昔貳師將軍拔佩刀刺山飛泉湧出乃整衣服向  
井再拜有頃  
水泉轟出

吳子野絕粒不睡過作詩戲之芝上人陸道士  
皆和予亦次其韵

聊為不死五通仙  
終了無生一大緣  
獨竊有聲知半夜

老蠶不食已三眠  
憐君解比人間夢

公自注芝有夢齋子由作銘  
許

我時逃醉後禪會  
與江山成故事  
不妨詩酒樂新年

華嚴經寶輪妙莊嚴世界有佛名功德海光明輪於彼時為五通仙現大神通六萬諸仙前後圍繞圓覺經心悟實相具無生忍杜子美飲中八仙歌蘇晉長齋繡佛前醉中往往愛逃禪

次韻惠循二守相會

陰字韵四詩墨蹟及惠守和篇並歲吳興秦氏此詩

云賦次韻南圭使君與循州倡酬一首循州  
蓋周彥質字文之已見三十六卷有答周循  
州詩南圭使君乃惠州守方子容後題云因  
見二公唱和之盛忽破戒作此詩與文之一  
閱訖即焚之  
慎勿傳也

共惜相從一寸陰酒杯雖淺意殊深且同月下三人影  
莫作天涯萬里心東嶺近開松菊徑南堂初絕斧斤音  
知君善頌如張老猶望携壺更一臨

禮記晉獻文子成室張老曰美哉輪焉美哉奐焉歌於  
斯哭於斯聚國族於斯文子北面再拜稽首君子謂之  
善頌  
善禱

又次韻二守許過新居

先生真蹟云載啟疊蒙寵示佳篇仍許過顧新

居謹依韵上謝伏望笑覽集本作曉牕清快墨蹟作明快後題云一閱訖章毀之切告切

告集本與後詩相連題云次韵二守同訪新居以墨蹟觀之非也今析題為二且載南圭

一詩使託名先生集中藉以不朽云按南圭詩今缺

數畝蓬蒿古縣陰曉牕明

一作清

快夜堂深也知卜築非

真宅聊欲跣趺看此心聞道携壺問奇字更因登木助

微音相娛北戶江千頃直下都無地可臨

大毗婆娑論結跣趺坐是相圓滿禮記檀弓孔子之故人曰原壤其母死夫子助之沐槨原壤登木曰久矣子

之不託於音也歌曰狸首之斑然執女手之  
卷然王簡栖頭陀寺碑飛閣逶迤下臨無地

又次韵二守同訪新居

墨跡云次韵南圭文之二太守同過白鶴新居

之什伏望採覽後云請一  
呈文之便毀之切告切告

此生真欲老牆陰卻掃都忘歲月深拔薤已觀賢守政  
折蔬聊慰故人心風流賀監常吳語憔悴鍾儀獨楚音  
治狀兩邦俱第一潁川歸去肯重臨

劉禹錫牆陰歌莫言牆陰數尺閒老盡主人如等閑拔  
薤用後漢龐參任棠事詳廿四卷遺直坊詩注陶淵明  
詩窮巷隔深轍頗回故人車歡然酌春酒摘我園中蔬  
杜子美遣興詩賀公推吳語在位常清狂左傳成九年

晉侯觀於軍府見鍾儀問之曰南冠而縶者誰也有司對曰鄭人所獻楚囚也使稅之問其族對曰伶人也公曰能樂乎對曰先父之職官也敢有二事使與之琴操南音互見十七卷陳州與文郎詩注漢黃霸傳為潁川太守治為天下第一徵守京兆尹坐貶秩有詔歸潁川前後八年郡中愈治

### 循守臨行出小鬟復用前韻

學語雛鶯在柳陰臨行呼出翠帷深通家不隔同年面

公自注文之與得路方知異日心趁著春衫遊上苑要

求國手教新音嶺梅不用催歸騎截鞚須防舊所臨

公自

注文之  
嘗伴韶

撫言在沆判蜀盧瑑曰紫陌尋春便隔同年之面青雲得路可知異日之心哉韋唐姚元崇牧荊州事已見

種茶

松閒旅生茶已與松俱瘦茨棘尚未容蒙翳爭交構天  
公所遺棄百歲仍稚幼紫笋雖不長孤根乃獨壽移栽  
白鶴嶺土軟春雨後彌旬得連陰似許晚遂茂能忘流  
轉苦戢戢出鳥味未任供白磨且可資摘嗅千團輸大  
官百餅銜私鬪何如此一啜有味出吾囿

後漢先武紀野穀旅生註旅寄也陸羽茶經紫者上綠者次荀者上芹者次又建人謂鬪茶為茗戰茶譜蜀州



雀舌鳥嘴麥穎  
故用鳥味字

白鶴山新居鑿井四十尺遇磐石石盡乃得泉  
海國困蒸溽新居利高寒以彼陟降勞易此寢處乾但  
苦江路峻常慚汲腰酸矻矻煩四夫磽磽斲層巖彌旬  
得尋丈下有青石磐終日但迸火何時見飛瀾豐我祭  
與醪利汝椎與鑽山石有時盡我意殊未闌今朝僮僕  
喜黃土復可搏晨瓶得雪乳莫甕停冰湍我生類如此  
何適不艱難一勺亦天賜曲肱有餘歡

三月二十九日二首

南嶺過雲開紫翠北江飛雨送淒涼  
酒醒夢回春盡日閉門隱几坐燒香

門外橘花猶的皜牆頭荔子已爛斑  
樹暗草深人靜處捲簾歌枕卧看山

吾謫海南子由雷州被命即行了不相知至梧  
廼聞尚在藤也旦夕當追及作此詩示之

九疑聯縣屬衡湘蒼梧獨在天一方  
孤城吹角煙樹裏

落日未落江蒼茫幽人拊枕生歎息我行忽至舜所藏  
江邊父老能說子白須紅頰如君長莫嫌瓊雷隔雲海  
聖恩尚許遙相望平生學道真實意豈與窮達俱存亡  
天其以我為箕子要使此意留要荒他年誰作地輿志  
海南萬古真吾鄉

李太白遠別離九疑聯綿皆相似薛士昭九疑山圖記  
道州寧遠縣南六十里有九疑山山有九峯一曰蕭韶  
二曰女英三曰石城四曰蛾皇五曰朱明六曰桂林七  
曰華蓋八曰巴林九曰石樓周四百餘里其形相似見  
者疑之故曰九疑蒼梧今梧州前志云舜葬於此記曰  
葬者藏也古樂府白紵歌愁來夜遲猶歎息拊枕思君

終反側杜子美詩棟蓐一別永相望後漢東夷濊國傳  
昔武王封箕子於朝鮮箕子教以禮義田蠶又制八條  
之教其人終不相盜無門戶之閉婦人貞信飲食以籩  
豆尚書五百里要服五百里荒服孔氏云綏服外之五  
百里要束以文教要服外之五百里言荒又簡  
畧也南史顧瑩王撰輿地志三十卷行於世

行瓊儋閒肩輿坐睡夢中得句云千山動鱗甲  
萬谷酣笙鐘覺而遇清風急雨戲作此數句

四州環一島百洞蟠其中我行西北隅如渡月半弓登  
高望中原但見積水空此生當安歸四顧真途窮眇觀  
大瀛海坐詠談天翁茫茫太倉中

一作區區  
魏中梁

一米誰雌

雄幽懷忽破散永嘯來天風千山動鱗甲萬谷酣笙鐘  
安知非羣仙鈞天宴未終喜我歸有期舉酒屬青童急  
雨豈無意催詩走羣龍夢雲忽變色笑電亦改容應怪  
東坡老顏衰語徒工久矣此妙聲不聞蓬萊宮

四州言瓊崖儋萬也漢賈捐之傳云朱崖儋耳郡皆在  
南方海中洲居史記孟子傳騶衍言中國名曰赤縣神  
州內有九州禹之序九州是也不得為州數中國外如  
赤縣神州者九乃所謂九州也於是有裨海環之人民  
禽獸莫能相通乃有大瀛海環其外天地之際焉又鄒  
衍之術迂大而閎辨故齊人頌曰談天衍莊子秋水篇  
計中國之在海內不似稊米之在太倉乎又則陽篇通  
達之中有魏於魏中有梁於梁中有王王與蠻氏有辯

乎列子周穆王篇王及化人之宮實以為清都紫微鈞  
天廣樂帝之所居魏夫人傳青童君未降夫人之別寢  
命青華玉女烟景珠擎西盈之鐘夢雲用  
宋玉高唐賦笑電用玉女投壺事並已見

次前韵寄子由

我少即多難遭回一生中百年不易滿寸寸彎強弓老

矣復何言榮辱今兩空泥洹尚一路

公自注古語云十方薄伽梵一路洹

樂門梵語泥洹此云涅槃

所向餘皆窮似聞崆峒西仇池迎此翁胡

為適南海復駕垂天雄下視九萬里浩浩皆積風回望  
古合州屬此琉璃鐘離別何足道我生豈有終渡海十

年歸方鏡照兩童還鄉亦何有暫假壺公龍我省向我  
笑錦水為君容天人巧相勝不獨數子工指點昔遊處  
蓬萊生故宮

仇池注詳三十二卷雙石詩再見唐地理志雷州海康  
郡本合州貞觀元年更名漢書項羽贊舜蓋重童子項  
羽又重童子童即瞳也西京雜記高祖初入咸陽宮周  
行庫藏云云有方鏡廣四尺九寸高五尺表裏有明人  
直來照之影則倒見以手掩心即見五臟有病則知所  
在後漢費長房傳有老翁賣藥懸一壺於市肆市罷翁  
跳入壺中長房見而異焉因詣翁俱入壺中於是隨入  
深山長房辭歸與一竹杖曰騎此任所之既至可以杖  
投葛陂中也長房乘杖須臾來歸即以杖投陂顧視則  
龍也互見八卷刁景純席上詩注丹臺錄謝元一名壺

公乃費長房所見暮入空壺者史記伍子胥傳中包胥謂子胥曰人衆者勝天天定亦能勝人

安期生

并引

安期生世知其為仙者也然太史公曰蒯通善齊

人安期生生嘗以策干項羽羽不能用羽欲封此

兩人兩人終不肯受亡去

見漢蒯通傳

予每讀此未嘗

不廢書而歎嗟乎仙者非斯人而誰為之故意戰

國之士如魯連虞卿皆得道者歟

安期本策士平日交蒯通嘗干重瞳子不見隆準公應



如魯仲連抵掌吐長虹難堪踞牀洗寧挹扛鼎雄事既  
兩大繆漂然爾遺風廼知經世士出世或乘龍豈比山  
澤臞忍饑啖柏松縱使偶不死正堪為僕僮茂陵秋風  
客望祀猶蟻蠡海上如瓜棗可聞不可逢

列仙傳須於食柏實偃佺食松實續仙傳大中間有野  
人體生綠毛云我即姚泓也食松柏得長生唐逸史亦  
云漢武帝葬茂陵李賀金人辭漢歌茂陵劉郎秋風客  
漢郊祀志武帝望祀蓬萊之屬我至殊庭如瓜棗注屢  
見

夜夢 并引

七月十三日至儋州十餘日矣澹然無一事學道未至靜極生愁夜夢如此不免以書自怡

夜夢嬉遊童子如父師檢責驚走

音奏

書計功當畢春秋

餘今乃始及桓莊初怛然悸寤心不舒起坐有如挂鉤

魚我生紛紛嬰百緣氣固多習獨此偏弃書事君四十

年仕不顧

一作顧

留書繞纏自視汝與丘孰賢易韋三絕

丘猶然如我當以犀革編

韓退之詩歸舍不能食有如魚挂鉤史記孔子世家晚而喜易序彖象說卦文言讀易韋編三絕左傳莊十二

年衛人請南宮萬於陳  
飲之酒而以犀革裹之

遷居之夕聞鄰舍兒誦書欣然而作

幽居亂鼃黽生理半人禽  
楚然已可喜況聞弦誦音  
兒聲自圓美誰家兩青衿  
且欣集齊咻未敢笑越吟  
九齡起韶石姜子家日南  
吾道無南北安知不生今  
海濶尚挂斗天高欲橫參  
荆榛短牆缺燈火破屋深  
引書與相和置酒仍獨斟  
可以侑我醉琅然如玉琴

毛詩子衿刺學校廢也青青子衿悠悠我心唐張九齡  
韶州曲江縣人韶州有韶石山姜公輔有高才數奏詳

亮德宗器之

愛州日南人

聞子由瘦

公自注儋耳至難得肉

五日一見花猪肉十日一遇黃雞粥土人頗頗食諸芋  
薦以薰鼠燒蝙蝠舊聞蜜唧嘗嘔吐稍近蝦蟇緣習俗  
十年京國厭肥羜日日烝花壓紅玉從來此腹負將軍  
公自注俗諺云大將軍食飽捫腹而歎曰我不負汝左  
右曰將軍固不負此腹此腹負將軍未嘗出少智慮也  
今者固宜安脫粟人言天下無正味唧蛆未遽賢麋鹿  
海康別駕復何為帽寬帶落驚僮僕相看會作兩臞仙

還鄉定可騎黃鵠

杜子美遠閩詩頗頗食黃魚又秦州詩充腸多諸芋朝  
野僉載嶺南獠民好為蜜唧即鼠胎未瞬通身赤蠕者  
飼之以蜜餌之筵上躡躡而行以筋挾取咬之唧唧作  
聲故曰蜜唧韓退之食蝦蟇詩余初不下喉近亦能稍  
稍詩小雅既有肥羜以速諸父莊子齊物論民食芻豢  
麋鹿食薦唧唧甘帶鵲鴉嗜鼠四者孰知正味九域志  
雷州海康郡子由時責授雷州別駕漢西域傳烏孫公  
主悲愁為歌曰常居土思兮心內傷願為黃鵠兮歸故  
鄉

客俎經旬無肉又子由勸不讀書蕭然清坐乃

無一事

病怯腥鹹不買魚爾來心腹一時虛使君不復憐烏攫  
屬國方將掘鼠餘老去獨收人所棄游哉時到物之初  
從今免被孫郎笑絳帕蒙頭讀道書

烏攫用黃霸傳事再見漢蘇武傳武在匈奴廩食不至  
掘野鼠弃草實而食之歸拜典屬國漢貨殖傳白圭樂  
觀時變故人弃我取人取我予莊子老聃曰吾遊於物  
之初再見江表傳道士瑯琊于吉往來吳會立精舍讀  
道書制作符水以治病人多事之策於郡城門樓會諸  
將賓客吉趨度門下諸將賓客三分之一下樓迎之策  
怒收吉諸將連名陳乞策曰昔南陽張津為交州刺史  
舍前聖典訓廢漢家法律常著絳帕頭鼓琴燒香讀道  
書云以助化卒為南夷所殺此甚無益諸君但未  
悟耳今此子已在鬼錄勿復費紙筆也即命斬之

宥老楮

我牆東北隅張王

張王並去聲

維老穀樹先樗櫟大葉等桑

柘沃流膏馬乳漲墮子楊梅熟胡為尋丈地養此不材

木蹶之得輿薪規以種松菊靜言求其用略數得五六

膚為蔡侯紙子入桐君錄黃繒練成素黝面頰音作玉

濯灑烝生菌腐餘光吐燭雖無傲霜節幸免狂醒毒孤

根信微陋生理有倚伏投斧為賦詩德怨聊相贖

張王後漢班超傳遂雄張南道張音丁亮反韓退之荀詩得時兮張王又劉禹錫蒲桃歌張王日日高本草楮

實一名穀實詩小雅爰有樹檀其下維穀又國風桑之  
未落其葉沃若後漢宦者蔡倫傳自古書契多編以竹  
簡其用縑帛者謂之為紙縑貴而簡重並不便於人倫  
乃造意用樹膚麻頭及敝布魚網以為紙天下咸稱蔡  
侯紙唐藝文志有桐君藥錄三卷王注黃繒黃絹也世  
蓋以楮實練絹矣黝面黑色也頽洗也顧命沘頽水是  
也一云楮汁能去面黝莊子蒸生菌又商丘大木嗅之  
使人狂醒三日不已老子禍兮福所倚福兮禍所伏

觀碁

并引

予素不解碁嘗獨游廬山白鶴觀觀中人皆闔戶  
晝寢獨聞碁聲於古松流水之間意欣然喜之自  
爾欲學然終不解也兒子過廼羸能者儋守張中



日從之戲予亦隅坐竟日不以為厭也

五老峯前白鶴遺趾長松蔭庭風日清美我時獨游不  
逢一士誰歟棊者戶外屨二不聞人聲時聞落子紋枰  
坐對誰究此味空鉤意釣豈在魴鯉小兒近道剝啄信  
指勝固欣然敗亦可喜優哉游哉聊復爾耳

禮記戶外有二屨言聞則入言不聞則不入北夢瑣言  
宣宗朝日本國王子入朝帝令待詔顧師言與之對棊  
王子出紋楸玉局冷暖玉碁子蓋玉之  
蒼者如楸玉色其冷暖者言冬暖夏涼

糴米

糴米買束薪百物資之市不緣畊樵得飽食殊少味再  
拜請邦君願受一廛地知非笑昨夢食力免內愧春秧  
幾時花夏稗忽已穠悵焉撫耒耜誰復識此意

入寺

曳杖入寺門輯杖挹世尊我是玉堂仙謫來海南村多  
生宿業盡一氣中夜存旦隨老鴉起饑食扶桑暎光圓  
摩尼珠照耀玻瓈盆來從佛印可稍覺魔忙奔閑看樹  
轉午坐到鐘鳴昏斂收平生心耿耿聊自溫

楚辭遠遊一氣孔神兮於中夜存虛以待之兮無為  
之先又九歌暇將出兮東方照吾檻兮扶桑再見

### 次韵子由三首

#### 東亭

仙山佛國本同歸世路玄關兩背馳到處不妨閑卜築  
流年自可數期頤遙知小檻臨塵市定有新松長棘茨  
誰道茅簷劣容膝海天風雨看紛披

#### 東樓

白髮蒼頭自照盆董生端合是前身獨棲高閣多詞客

為著新書未絕麟小醉易醒風力軟安眠無夢雨聲新

長歌自調真堪笑底處人間是所欣

公自注柳子厚詩云高歌逐故室自

調非所欣

王注董生董仲舒也高閣新書意指仲舒下帷講誦不窺園及著玉杯繁露等書特不泥本事耳

### 椰子冠

天教日飲欲全絲美酒生林不待儀自漉疎巾邀醉客

更將空殼付冠師

公自注前漢高紀注云薛有作冠師

規摹簡古人爭看

簪導輕安髮不知更著短簷高屋帽東坡何事不違時

漢袁盎傳字絲為吳相兄子種謂盎曰南方卑濕絲能  
日飲亡何詳四卷和劉道原詠史又屢見番禺雜編柳  
子中有汁二三升許蕃人好飲謂之柳子酒戰國策帝  
女儀狄造酒進之於禹澠巾用陶潛事屢見隋禮儀志  
簪導者簪所以建髮於冠導所以導櫟髮入巾幘之  
裏晉輿服志江左時楚人已著帽士人亦往往而然但  
其頂圓後乃高其屋云

### 次韵子由月季花再生

幽芳本長春暫瘁如蝕月且當付造物未易料枯朽也  
知宿根深便作紫笋茁乘時出婉婉為我暖栗烈先生  
蚤貴重廟論推英拔而今城東瓜不記召南葵陋居有

遠寄小圃無濶躡還為久處計坐待行年匝

公自注子由明年六

十臘果綴梅枝春杯浮竹葉誰言一萌動已覺萬木活

聊將玉蘂新

公自注世謂此玫瑰花也

插向綸巾折

世說謝萬詣簡文著白綸巾鶴氅共談論折巾用郭林宗事再見

### 次韻子由浴罷

理髮千梳淨風晞勝湯沐閉息萬竅通霧散名乾浴頽  
然語默喪靜見天地復時令具薪水漫欲濯腰腹陶匠  
不可求盆斛何由足

公自注海南無浴器故常乾浴而已

老雞卧糞土振

羽雙瞋目倦馬驅

之善切

風沙奮鬣一噴玉垢淨各殊性

快愜聊自沃雲母透蜀紗琉璃瑩  
蘄竹稍能夢中覺漸使生處熟  
楞嚴在牀頭妙偈時仰讀反流歸  
照性獨立遺所矚未知仰山禪已  
就季主卜安心會自得助長母相  
督

楚辭離騷蹄爾髮兮陽之阿淮南子湯沐具而熾茲弔  
噴玉字出穆天子傳詳廿三卷迨作淮口過風詩注傳  
燈錄老宿有語生疎處常令熟熟熱處放令生疎楞  
嚴經反流全一六用不行傳燈錄仰山惠寂禪師問香  
嚴近日見處如何香嚴乃有偈曰去年貧未是貧今年  
貧始是貧去年無卓錫之地今年錫也無仰山曰汝只  
欽定四庫全書

施註蘇詩

得如來禪未得祖師禪張景陽  
雜詩歲暮懷百憂將從季主卜

借前韻賀子由生第四孫斗老

今日散幽憂彈冠及新沐況聞萬里孫已報三日浴朋  
來四男子大壯泰臨復開書喜見面未飲春生腹無官  
一身輕有子萬事足舉家傳吉夢殊相驚凡目爛爛開

眼電礲礲峙頭玉

公自注李賀詩云頭玉礲礲  
省刷翠杜郎生得真男子

但令強

筋骨可以耕衍沃不須富文章端解耗紙竹君歸定何  
日我計久已熟長留五車書要使九子讀

公自注吾與  
子由共九孫



男簞瓢有內樂軒冕無流矚人言适似我窮達已可卜

蚤謀二頃田莫待八州督

公自注吾前後典八州

幽憂字出莊子讓王篇彈冠用楚辭漁父並已見周易復亨出入無疾朋來無咎王注為有四男子故用大壯泰臨復句蓋一陽生則為復二陽生則為臨三陽生則為泰四陽生則為大壯白樂天家醞詩捧疑明水從空化飲似陽和滿腹春詩小雅吉夢維何維熊維羆男子之祥眼電晉王戎事再見适子由幼子

### 獨覺

瘴霧三年恬不怪反畏北風生體疥朝來縮頸似寒鴉  
焰火生薪聊一快紅波翻屋春風起先生默坐春風裏

浮空眼纈散雲霞無數心花發桃李翛然獨覺午牕明  
欲覺猶聞醉鼾聲回首向來蕭瑟處也無風雨也無晴  
十二月十七日夜坐達曉寄子由

燈燼不挑垂暗藥爐灰重撥尚餘薰清風欲發鴉翻樹  
缺月初升犬吠雲閉眼此心新活計隨身孤影舊知聞  
雷州別乘應危坐跨海幽光與子分

謫居三適

旦起理髮

安眠海自運浩浩朝黃宮日出露未晞鬱鬱濛濛松老  
榔從我久齒踈含清風一洗耳目明習習萬竅通少年  
苦嗜睡朝謁常惛惛爬搔未云足已困冠巾重何異服  
轅馬沙塵滿風駿凋鞍響珂月實與杻械同解放不可  
期枯柳豈易逢誰能書此樂獻與腰金翁

莊子海運則鵠徙於南溟王注道家以臍下為丹田腦  
頂為黃宮故云若要不老還精補腦又先生嘗有詩云  
何異枯楊便馬疥此云枯  
柳豈易逢翻前詩意也

### 午牕坐睡

蒲團蟠兩膝竹几閣雙肘此間道路熟徑到無何有身心兩不見息息安且久睡蛇本亦無何用鉤與手神凝疑夜禪體適劇夕酒我生有定數祿盡空餘壽枯楊不飛花膏澤回衰朽謂我此為覺物至了不受謂我今方夢此心初不垢非夢亦非覺敢問希夷叟

睡蛇出佛遺教經再見周易枯楊生梯何可久也楊文公談苑陳搏閉門獨卧至百日周世宗令於禁中扃戶以試甚異之雍熙初賜號希夷先生

夜卧濯足

長安大雪年束薪抱衾裯雲安市無井斗水寬百憂今  
我逃空谷孤城嘯鵲鷗得米如得珠食菜不敢留況有  
松風聲釜鬲鳴颼颼瓦盎深及膝時復冷暖投明燈一  
爪剪快若鷹辭韝天低瘴雲重地薄海氣浮土無重腿  
藥獨以新水瘳誰能更包裹冠履裝沐猴

西京雜記元封二年大寒雪深五尺野鳥獸皆死牛馬  
悉踣縮如蝟杜子美詩漠時長安雪一丈牛馬毛寒縮  
如蝟又詩城中斗米換衾裯相許寧論兩相直又引水  
詩月峽瞿唐雲作頂亂石崢嶸俗無井又人生留滯生  
理難斗水何直百憂寬說苑墨子謂滑釐曰今凶年有  
欲與子隋侯之珠者又欲與子鍾粟者得粟不得珠得

珠不得粟子將何擇重腿字出左傳已見上  
卷柳子厚栽竹詩適有重腿疾蒸鬱寧所宜

子由生日

上天不難知好惡與我一方其未定間人力破陰陽小  
忍待其定報應真可必季氏生而仁觀過見其實端如  
柳下惠焉往不三黜天有時而定壽考未易卑兒孫七

男子

公自注子由三子四孫

次第皆逢吉遙知設羅門獨掩懸磬

室回思十年事無愧篋中筆但願白髮兄年年作生日

尚書洪範惟天陰陽下民注云陽定也天不言而嘿定下民也又身其康強子孫其逢吉

以黃子木拄杖為子由生日之壽

靈壽扶孔光菊潭飲伯始雖云閑草木豈樂蒙此恥一  
時偶收用千載相瘢痕海南無嘉植野果名黃子堅瘦  
多節目天材任操倚嗟我始剪裁世用或緣此貴從老  
夫手往配先生几相從歸故山不愧仙人杞

公自注本草枸杞一

名仙  
人杖

漢孔光傳為帝太師詔賜靈壽杖盛弘之荊州記菊水  
出穰縣芳菊被崖水極甘香谷中飲此水上壽百二十  
七八十者猶以為天太尉胡廣患風疾休沐南歸常飲  
此水後疾遂瘳年八十二乃薨廣字伯始王注孔光胡

廣二人皆畏懦諂諛故云草木蒙恥番禹雜編黃子類  
文州子橘屬也淡黃色晉和嶠傳庾數見而歎曰森森  
如千丈松雖礫石多節目  
施之大廈有棟梁之用



施註蘇詩卷三十七